

攻

媿

集

八



貴州省圖書館  
中文書



攻 媿 集  
(八)

J  
17.8  
1  
192010

撰 鑰 樓

# 攻媿集卷三十九

## 外制

大中大夫沈揆轉一官守權吏部侍郎致仕

敕侍朝甚喜。方儀荷橐之聯。何恙之深。忽上掛冠之請。初不聞曾子之疾。乃欲爲疏傅之歸。具官某文有菁華。學稱博雅。頃屢登于位著。矧夙備于儲寮。嗣服云初。首頌于召節。殿邦旣久。終入于從班。謂其數器之兼。畀以二銓之重。預修史策。勸講經帷。造膝陳謨。曾未浹日。抗章告老。胡不待年。許尋里社之閒。仍守天官之秩。子騫之在汶上。莫遂挽留。公幹之臥漳濱。徒深懷舊。尙祇渙渥。以保修名。

沈揆贈四官

敕孟軻之致爲臣。方軫留行之念。曾參之啓予手。忽聞將死之言。撫往事以何追。嗟若人之不淑。具官某老于文學。志在事功。博極羣書。而發于英詞。上下千載。而見之篤論。任握節分符之寄。所在著稱。登籒筆持橐之班。于時未久。抱疴自列。納祿言歸。當危懼以奏篇。眷忠勤而隕涕。爰加卹典。悉按彝章。進官序以甚優。異賞延而不吝。尙惟英爽。歆此寵靈。

皇太后慶壽武學生加封祖父母父母定詞

上舍內舍生

敕具某人父某。朕以祖后春秋益高。乃月正元日。恭侍慈皇。仰奉慶禮。錫類之恩。溥及中外。一命而上。祖父母父母壽登八十者。始得預此。爾年方從心。以有子列在右庠。嘗預舍選。寵以命秩。祖父并父云。遂加命秩。祖母并母云。寵以恩。最爲優異。其服明渙。以迪壽康。

外舍生

敕具某人父某。朕以祖后春秋益高。乃月正元日。恭侍慈皇。仰奉慶禮。錫類之恩。溥及中外。惟爾有子。祖父母云。有孫。列在右學。年登八秩。寵以恩封。父母同詞。加封云。加進恩封。其服渙恩。以綏吉履。

勝捷下名都虞候楊彥換從義郎王檝換秉義郎

敕具官某。汝久隸羽林。積勞可紀。授以勇爵。實應舊章。往其欽承。益務忠恪。

王進之知德慶府

敕具官某。爾頃以天府貳車。往守武陵。突不得黔。已復報罷。朕心憫焉。晉康雖遠。實高皇興王之地。舉以授汝。以觀汝能。尙其懋哉。毋替朕命。

大理寺丞林季友吏部郎官主管侍郎右選

敕具官某。郎曹二十有八。莫劇于武選。文書盈几。難以編察。涉筆占位。猶恐不暇。非靜而敏者。未易得其要領也。爾以儒者而通世務。桐川奉最。再轉而丞于廷尉。未久也。選居星省。遂與三銓。鵬弁之士。惟吏是

聽雖有抑滯不能自伸爾其念哉勉贊而長

浙西提舉黃通本路提刑

敕具官某三丞出擁使節還爲郎曹者多矣以爾之賢列屬憲臺丞于中祕使事修舉宜俾來歸浙河以西服爾清裁爾亦以靜退自處無羨于登仙就易祥刑之司以爲畿甸之望表廉幹傲惰儉民以不寃清我臬事朕豈使爾徒久于外哉

宗正丞鄭公顯浙西提舉

敕具官某朕惟倉庾斂散之法山海摘糶之利分道置使所任甚專畿甸之間選用尤重以爾學瞻而文敏外寬而內剛進丞司宗華間架暢兼掌名表屬詞最工持節有行去天尺五酌豐歉而賦政辨能否以簡儉惟爾之能思所以稱

龍圖閣直學士程大昌除龍圖閣學士致仕

敕引經告老爲神虎掛冠之歸念舊疏榮峻龍馬負圖之職以優耆德以表高風具官某秉操堅剛著書淵博蚤游冊府擅溫厚爾雅之文晚侍儲闈賴直諒多聞之友十年筆橐人望素隆數路麾符民庸益著高蹈躡塵之表久從香火之間年旣及于從心志欲祈于納祿羽翼之資黃綺毋忘伐木之詩丘壑之有臯夔當遂考槃之樂尙祇明渙式介蕃釐

太府寺主簿林思濟大理寺丞

敕具官某。先王用刑之法。莫詳于甫刑一書。有曰。故乃明于刑之中。率乂于民。秉彝爾蚤。以經術先多士。嘗誦其言矣。入仕朝行。有靖共之譽。廷尉選丞。以爾爲之。其試所學。以廣朕欽恤之意。

主管戶部架閣孫元卿太學正

敕具官某。爾以甲科自奮。用爲掌故之官。中東艱棘。蓋久而後得之。退然自牧。亦旣再歲。賢關清選。爾宜居之。子率以正。孰敢不正。橋門之士。將于爾觀焉。

修職郎權建寧府政和縣尉胡杞擒獲許伯祥等循兩資

敕具官某。警捕尉曹職也。姦民寇攘。爾能致之。連帥有言。何愛旌賞。

余永弼知閩州

敕具官某。閩風錦屏之勝。士誦少陵之詩。恨不得身到其地。爾乃以二千石臨之。豈易得哉。爾起儒門。萬里入蜀。洊更事任。雅有能稱。郡寄寢高。事權益重。無輕民事。克勤小物。則可以稱此矣。

王寅知江州

敕具官某。長江上游。以潯陽爲重鎮。分屯禁旅。控禦一面。守將非它郡比也。以爾三領左符。老于吏治。番禺之政。人多稱之。其彈撫字之心。無改中和之舊。使兵民晏然。隱若敵國。則不負選侯之舉矣。

丁逢潼川府路轉運判官

敕具官某。爾有志當世。結知慈皇。守郴陽。使湖外。又皆有聲績可紀。今日有用之才也。東川飛輓不重。不

以輕舁叱馭而往。毋憚馳驅。撫摩吾民。廉察羣吏。以稱外臺耳目之選。是惟休哉。

謝源明直煥章閣知温州

敕具官某。朕遴選諫臣。以廣聽覽。爾頃居九列。旋冠宰掾。察其堅正。擢在騎省。論事不回。方嚮于用。銜恤而歸。念之不忘。亦既卽吉。起鎮東土。惟永嘉在左。浙爲望郡。山川秀發。衣冠鼎盛。四邑相去才百里。而負山並海。壤地深遠。人物日庶。事亦滋繁。非得精明和惠之人。未易辦治。爾其人矣。堯章寓職。以寵爾行。俟訖外庸。登進未晚。尙其欽哉。

幹辦審計司范蓀太府寺主簿

敕具官某。蜀之范氏。如晉王謝。人物輩出。文獻相望。爾在今日。又其翹楚也。以世科發身。以吏課交薦。其在朝列。退然若無所修綜者。而人自稱之。勾稽外府。姑以序進。勉紹家學。以稱所蒙。

趙像之福建提刑

敕具官某。七閩祥刑之寄。選于乘久矣。以爾被服儒雅。屢持使節。往司宗盟。聲望日著。雖無預于吏治。已習知其民風。就乘輅車。不俟臨遣。聽訟吾猶人也。必也使無訟乎。聖人之言。固未易及。得情勿喜。尙惟勉旃。

江東運副傅伯壽直煥章閣

敕具官某。朕惟烈祖。聖學高妙。昭回之光。下飾萬物。煥乎文章。尊閣惟謹。寓直之寵。不以輕舁也。以爾天

賚警敏。一日千里。詞章精贍。連收三科。登著作之庭。于今十有八年矣。按刑將漕。益著外庸。爰錫寵名。以示褒表。討論潤色。豈其舍諸。

朱翺大理寺丞

敕具官某。惟爾祖光輔思陵。爾父又登從列。君子之澤未艾也。爾被賞延。乃能明習文法。致身廷評。出守辰陽。奉最以歸。進之棘丞。榮路無壅。益勉厥職。無忝爾先。

淮西運副趙師彝太府少卿淮西總領

敕具官某。國家分屯重兵。布列江潞。董饗之任。必選朝士臨之。而金陵莫重焉。爾決科自奮。飾以儒雅。有志事功。所至辦治。嘗使京口。見謂敏明。淮甸錢幣更張之餘。賴爾撫摩調護之力。民情悅服。名稱益彰。茲以亞卿。往司調度。足兵足食。復于爾觀焉。尙殫爾心。以副詳試之意。

廬州修城官修武郎建康都統司中軍權副將馬再興武顯郎左軍統領毛致通武經郎左軍統制馬通各轉一官

敕具官某等。合肥當淮西一面。俾葺堅城。以固吾圉。率衆庀工。迄底于成。各進厥官。庸勸勞勩。同安郡夫人武氏進封才人

敕朕肅正宮闈。日修于內。則整齊品秩。尤戒于私恩。必有柔儀。乃容序進。具封某稟資婉孌。履行純和。久承樛木之慈。得備貫魚之列。疏封名郡。錫號小君。知閱時之滋深。嘉率職之無怠。登之女御。示我壺彝。位



幾近于九嬪。爵亦儕于千石。帶弓箭而侍君側。吾豈務于燕游。理絲枲而獻歲功。爾尙勤于蠶織。

知建康府鄭僑吏部尙書

敕。司筦籥于留都。方資賢牧。典銓衡于選部。當任舊人。乃播綸言。載儀禁路。具官某。性資剛毅。學力精深。聲華蚤擅于倫魁。名節尤稱于傑特。訓辭溫厚。信獨步于一時。朝夕論思。率主盟于公議。旋由夕拜。進長天宮。閩部選侯。洊更鎮撫。秣陵謀帥。復藉保釐。屬興宣室之思。俾趣鋒車之召。渴聞讜論。日佇尙書之履。聲器使羣才。更賴山公之啓事。毋庸俟駕。亟遂歸班。

趙師程大理寺主簿

敕具官某。朝行簿領之官。勾稽之外。職業素簡。惟理官設屬。則有近制。廷評奏當之成。俾分考而訂正之。遴選非他比也。以爾天潢之秀。儒雅自將。試邑佐州。遇事不苟。且嘗列于朝矣。其服朕命。益觀汝能。

翰林醫效王懋兼重華宮祇應實及二年轉一官

敕具官某。朕祇事重華。尤謹于藥石之奉。爾以瘍醫。奉職惟謹。亦又再歲。在法當遷。俾陞爾階。其思所報。俞。徵知常德府。

敕具官某。武陵爲湖北名邦。以壽皇潛藩。地望增重。總數州之戎事。控五溪之喉衿。未嘗不選侯而用焉。爾出儒門。明習文法。有公廉之操。得溫厚之稱。嘗守高安。政適其平。郎曹卿寺。踐歷滋久。起家剖符。往鎮遐服。明聽朕言。無輕民事。

中奉大夫煥章閣待制知鄂州王信磨勸轉官

敕。一麾出守。久著于民。庸三載陟明。適登于吏考。乃頒恩命。俾進文階。具官某性識疏通。材猷敏勗。西掖擅演綸之美。東臺高批敕之風。易鎮會稽。暢威名于近甸。分符鄂渚。增形勢于上游。茲以年勞。應于治典。雖曰有司之定制。是爲增秩之殊榮。益圖爾功。以謹忠報。

知明州何澹母太淑人石氏該慶壽恩封齊安郡太夫人

敕。朕禮厚兩宮。當累洽重熙之際。年登八表。奉隆慈備福之尊。乃推老老之心。庸廣親親之道。具封某氏。起自名族。嬪于大門。善相其夫。爲部使者之貴。親見吾子。任中執法之嚴。方乘輕軒。以就祿養。逢國家之慶。霈開湯沐之新封。位正小君。爰擇黃岡之勝。恩隆晚歲。式增彤管之華。益介壽祺。以儀閨闈。

太府少卿吳珽太府卿淮東總領

敕。具官某。國家東巡吳會。列戍江淮。惟此丹陽。尤爲近屏。護餉旣久。可後褒升。爾儒雅雍容。克勤吏道。許歷版曹司金之職。遂登外府亞卿之華。頃以王臣。往給軍食。調娛酬酢。上下帖然。就加惟月之班。其服自天之寵。勿替于舊。益圖爾功。

迪公郎李閱父儀甫該慶壽恩封承務郎致仕

敕。具官某。爾積行有素。年過九齡。有子在官。實應封典。授之京秩。以爲爾寵。

宮人張氏封郡夫人

敕。朕日聽外朝。退修內治。婦官具設。尤嚴陞級之分。恩命所加。必視功容之懿。具位某氏。雅稱柔履。選自良家。事宮壺以服勞。閱歲時而滋久。啓封名郡。進位小君。仍頒祿秩之優。庸示禁庭之寵。其祗渙渥。益懋芳猷。

訓武郎臨安府湖州巡轄遞鋪梁青違滯金字牌降一官

敕具官某。置郵所以傳命令。達章奏。矧制闕動係邊事。可少稽乎。爾怠于職。行不以時。奪爾一階。以懲不恪。

國子錄陳邕武學博士

敕具官某。爾掌教國子。蔚然有稱。嘗對便朝。論事尤切。長于右學。益觀通才。武尙止戈。兵實貴謀。其以斯意。訓迪學士。庶幾得有用之才。以備將帥之選焉。

王介國子錄

敕具官某。士登甲科。立致膺仕。亦惟行誼有以稱。則得之斯無異辭。爾當龍飛之初。居俊秀前列。輔邦入幕。以儒雅飾吏。是能稱此科級者。擢居冑監。典我教事。又能稱此。使學者宗之。則爾之進未艾也。

樞密院編修官許介宗正丞

敕具官某。司宗有丞。在頌臺册府之間。非列寺比。故其選甚高。爾蚤擢乙科。嘗試劇縣。慈皇聞其善政。就加增秩之寵。再入脩門。其才益著。比以編摩之職。攝郎省參宰掾矣。茲登清途。預修寶牒。益謹厥職。以究

爾長。

王溉戶部郎官

敕具官某。版曹掌國之大計。而左民尤爲繁劇。州邑之訟。有不得其平者。率造焉。思得疏通詳練之士。久矣。爾源流家傳。緣飾吏事。往使于蜀。精敏有餘。操贏貲以蘇疲瘵。嘗加詔獎。召對便朝。審其可用。往振茲職。益觀汝能。

夔路運判馮震武戶部郎官四川總領

敕具官某。朕惟武王。不忘遠之意。西南萬里。選才尤詳。矧總餉之寄。動關軍國。見大夫臨遣而行。或不及事。爾蜀國之彥。嘗列于朝。觀風夔門。能宣德意。加以民曹之職。就董五十餘州之賦。以給營壘之師。民力困矣。軍須方繁。足食足兵。佇觀儒效。

太常寺主簿張貴謨司農寺丞

敕具官某。爾學術該通。論議根據。一時清流也。頃試劇邑。乃有能聲。蓋嘗見于用矣。勾稽頌臺。進丞農屬。雖曰曾預禮樂制作之事。要須詳試簿書期會之間。爾惟通才。其體此意。

太社令陳峴太學博士

敕具官某。爾以紹興法從之孫。自奮宏博之科。宜仕于朝久矣。徊翔幕府。列屬容臺。賢士之關。師儒虛位。疇咨多士。僉曰汝宜。溫故知新。爾其自勉。

判建康府葛邲改判隆興府

敕。由端揆以殿邦。允藉保釐之略。爲上流而易鎮。更資撫御之才。爰授左符。載揚明綽。具官某。謀猷宏達。德度恢洪。三世名儒。益致家聲之顯。兩朝異眷。遂專國秉之隆。矧惟舊學之臣。久處洪樞之任。密參廟算。旣兼文武之資。祈解政機。遂付軍民之寄。加延恩而寓職。視上宰以疏榮。顧陳義以甚堅。爲相攸而改命。惟襟江帶湖之地。可以優賢。皆耕田鑿井之民。正宜坐嘯。其爲十連之帥。式邁千騎之行。噫。嘗本五兵。彌覺偃藩之重。周知萬務。豈云斂惠之難。尙訖外庸。益綏休寵。

新除吏部尙書鄭僑龍圖閣學士依舊知建康府

敕。召還選部。行領從臣之班。居守陪京。復分方面之任。選用之遴。中外則均。具官某。望重兩朝。才高衆俊。以三代之文。掌我帝制。以六經之學。格于君心。頃由天官。出鎮閩部。旋畀保釐之寄。實資鎮撫之功。尙書喉舌之官。固應圖舊。河東股肱之郡。故特召君。矧荒政之方修。亦遯章之杳至。俯徇借留之志。益高難進之風。龍閣陞華。用爲爾寵。麟符增重。克成厥終。益著外庸。以綏渙渥。

知臨安府錢塘縣趙盛大社令

敕。具官某。惟爾先正。光輔高皇。配饗廟廷。燕及後裔。凡爾昆弟。序進于朝。社稷之司。不以輕授。靖共爾位。毋忝爾先。

新知潼川府楊虞仲直祕閣知夔州

敕具官某夔子之國號稱夔門蓋蜀川之喉衿也謀帥之重實難其人爾西南望土三持使節蜀之民服爾名已久爾亦習知風俗之詳矣潼川未行易鎮茲部寓直中祕以爲爾寵民生凋瘵非他路比罷行利害沆可小康其尙勉哉以稱推擇之意

進士張昉陳舜咨賑濟補承節郎

敕某人荒政之修勸分爲急爾出私儲以濟饑民何愛一官用勸來者

承信郎權貨務檢法使臣錢煜收趁增羨轉一官

敕具官某權山海之利以佐邦儲賞典最厚爾奔走其下亦預進官尙勉公勤思有以稱

陳謙夔路運判

敕具官某夔門爲蜀要衝川陸險絕刀耕火種民生甚艱將輸之寄甚重郡計實仰給焉非通敏之士不在茲選以爾有用之學游試劇繁以南蘭陵吏課之最領湖右斂散之權茲爲朕行調度一道撫惠疲氓務去泰甚使田里得以安其生則朕之願憂寬矣

知台州徐子寅廣東提刑

敕具官某朕念廣東憲臺之重疇咨其人思得資高而練事法明而尙寬者居之大臣謂爾爲可且曰是嘗爲卿爲部使者帥維揚矣中更退閒起爲漢東而治辦丹丘之政民安而歌之使持節以按嶺海其必有以稱欽恤之意朕曰俞哉式過其驅毋替朕命

奉議郎提轄樞貨務謝儼收趁增羨轉一官

敕具官某。樞筭之繁。總于京邑。爾不欺于職。濟以變通。歲入之費。坐致贏羨。可無褒賞。以勸後來。其祇增秩之恩。益謹有司之守。

提點坑冶鑄錢趙不迹淮南運判

敕具官某。朕惟外臺飛輓之司。莫如東淮委寄之重。兼憲使刑辟之任。當使客冠蓋之衝。欲求通才。得我賢族。以爾奮由科級。尤精吏能。擁麾榮于三州。屢書課最。總貨泉于六道。式阜邦財。俾行邊疆。進專漕計。尙思忠報。益著外庸。

文思院造皇太后尊號冊寶監官從政郎陳庶監門儒林郎黃概各循一資

敕具官某。朕以月正元日。奉徽稱于祖后。白玉之牒。鏤刻甚工。黃金之璽。一鑄而就。雖曰有司之職。實惟莅事之勤。各進爾階。庸示嘉寵。

幹辦審計司劉誠之太常寺主簿劉德秀大理寺主簿

敕具官某等。列寺之屬。皆有勾稽。惟容臺禮樂是司。實預討論之事。惟廷尉刑獄至重。實分讞議之司。銓敘人才。二者尤不可輕也。以爾誠之聲稱籍甚。持以靖共。爾德秀文采蔚然。不事表襮。茲庸並命。其進未央。尙體優恩。各揚乃職。

福建提舉張濤提點坑冶鑄錢

敕具官某。國家分道遣使。各揚乃職。惟貨泉之寄。總六道百郡之權。歸于一大有司。視漢之鍾官。辯銅其重甚矣。非得通儒。不以輕畀。以爾抱負不凡。詞章精贍。出入朝行。見謂老成。使于二部。皆有聲績。舉以命汝。其爲朕謹調度。察姦欺。使邦財阜通。朕豈久汝于外哉。

宋之瑞福建提舉

敕具官某。爾以儒學之秀。三仕于朝。滋嚮于用。而又引去。朕亦念之。七閩斂散之司。職優而事重。疇咨庸使。起爾于家。士之官學。不以仕已爲喜。慍上之用人。豈以中外爲重輕。爾尙勉旃。以俟光寵。

從政郎揚州司法林樞搜獲銅錢循一資

敕具官某。邊郡嚴錢幣之出。而吏多不虔。爾能摘狀。遂正其罪。選階之進。以懋爾勤。

四川量試宗子伯揚時敏補承信郎

敕某人。爾在屬籍。遠處蜀道。能以文藝。優占科級。錫之武爵。尙其勉旃。

鎮江都統閻世雄管軍五年職事修舉轉遙郡刺史

敕具官某。國家分遣禁旅。列戍江城。京口捍蔽行都。最爲要近。爾以宿將。坐總戎輶。威名隱然。壁壘靖謐。五年于此。宜賞賢勞。遙刺侯邦。是爲異寵。益思忠報。毋替厥初。

慈福宮內人安化郡夫人方氏彭原郡夫人高氏清河郡夫人鄭氏竝轉國夫人胡氏蘇氏張氏竝封郡夫人



敕朕承累洽重熙之運。奉隆慈備福之尊。疇咨女御之良。爰畀恩光之渥。具位某氏稟資婉嫕。植行柔嘉。選在掖廷。蚤備婦官之列。事予祖后。寢更歲籥之深。屬慶典之告成。演褒綸而逮下。進封大國。胡氏蘇氏張氏云。啓封

名郡益懋小心。

煥章閣待制趙不流。換正任承宣使。知大宗正事。

敕擁東越之麾。方騰吏課。糾成周之族。有賴宗英。優加留務之班。式寵從臣之舊。具官某氣和而智敏。屬近而行尊。夙分帝胄之華。寢歷仕途之久。政成京邑。嘗進貳于司空。身處輔藩。訖褒升于次對。來奉便朝之覲。俾專屬籍之盟。示我異恩。超廉車而授職。藉卿宿望。壯磬石以承休。是曰當才。奚勞多訓。

修職郎鄭守仁。賀正旦使親屬循一資。

敕具官某。爾父頃使敵國。爾雖不預行役。而善于子職。使行者不內顧。而居者得所安。勞還之初。亦被曠賞。舉行于今。尙其祇服。

修職郎李良臣。奉使書狀官循兩資。

敕具官某。歲遣信使。修聘殊鄰。凡預驅馳。均有勞還之賞。矧以鉛槧爲職。潤色使華。疊進選階。于汝何吝。慶壽詔書宗子年八十以上。使臣年八十以上。願致仕者。竝轉一官定詞。

敕具官某。朕以正月上日。奉祖后萬年之觴。霑澤四方。及人之老。爾在屬籍。春秋益高。進以一階。用華晚節。使臣云。爾在右列。引年皆老。進官一等。是爲優恩。

宗子汝种與昉補承信郎

敷某等。爾在屬籍。逢時覃霈。能以文藝。自取科級。予之武爵。尙其勉旃。

淮東提舉陳損之創立紹熙堰除直祕閣

敷具官某。水利本以惠農。常平使者之職也。爾使淮東。善于其職。建議任責。迄觀厥成。俾來以圖。如指諸掌。閉縱隨時。條流有序。綿亘及數百里之遠。灌溉爲千萬頃之利。農商俱濟。旱澇無虞。使客漕運之往來。咸有賴焉。謝安爲逮。人以召伯名之。爾通敏有餘。不擾而辦。名以紹熙。淮民不汝忘也。寓直中祕。以寵爾勤。朕所以待汝者。何止是哉。

姚 渠 知 邕 州

敷具官某。南晉深入嶺右。控制蠻方。唐則分建五管。今亦併護數州。權任亞于連帥。選侯顧不重哉。以爾莅官不苟。有趨事赴功之心。治施與靖。咸有聲績。班班可紀。今又命爾以此邦。固圉寧民。尙其勉哉。

大理少卿許及之權禮部侍郎

敷。廷尉天下之平。游居卿列。宗伯春官之貳。徑入從班。是曰異恩。實由親擢。具官某才兼數器。識綜九流。蚤以多文之儒。務爲有用之學。方彈冠之伊始。已脫穎而不凡。禁闕拾遺。得真諫官之譽。藩方作牧。有古良將之風。比因奉最之歸。俾筮明刑之任。惟慶霈旣行之後。當郊禋再舉之時。儀曹久虛。禮典誰屬。釋爾平反之重。參予制作之司。有功過于張之賢。朕所知者。虞舜命夷夔之事。汝則兼之。益勉告猶。斯爲稱職。

四川茶馬朱致知京西運判

敕具官某。襄漢將漕之寄。雖所部不過數州。而實兼諸使之職。控制邊要。仍居上游。不輕以授人也。爾起世家。能以儒雅飾吏事。嘗守申伯。隨侯之國。又三使于蜀矣。萬里召還。復昇華節。惟爾鼻祖。致身九卿。以桐鄉之嗇夫。爲漢世之循吏。爾某苗裔。當慕前烈。以此位而行志。豈不易于一嗇夫哉。

訓武郎監權貨務陳仲堅收趁增羨轉一官

敕具官某。權筭之重。總于中都。爾能其官。歲入贏羨。加之命秩。以勸後來。

倉部郎官鄭湜大理少卿

敕具官某。國家刑辟之寄。總于廷尉。而職則分任焉。使習憲章者。視獄之成。而審聽囚徒。必命儒者臨之。其旨深矣。爾少而發藻。善爲詞章。立朝有鯁亮之稱。治民有循良之效。總餉江左。威譽日聳。郎潛未久。昇爾臬事。能深知設官分職之旨。斯無負今日推擇之意。往贊而長。亦惟欽哉。

起居郎陳傅良祕閣修撰嘉王府贊讀

敕具官某。漢四皓起商山。羽翼之功。千古稱之。朕則歎焉。使高帝能以卑辭厚禮聘之。以輔其子。則善矣。爾以一世名儒。羽儀于朝。抗議不回。引去甚亟。爾與吾兒游舊矣。爾旣厭直承明之廡。予亦閱勞以侍從之事。寵之祕撰之寓職。來爲朱邸之賓僚。尙過其行。庸副虛佇。

帶御器械霍汝翼復元官轉觀察使

敕具官某侍御之臣。苟曠瘼而必罰。歲時既久。俾牽復以自新。爾奮服禁嚴。雅稱詳謹。佩侯邦之組綬。官簿寢高。屬宸陛之囊鞬。戎容甚肅。頃懲慢弛。知務省循。況更政典之修。徑授廉車之秩。益思恭恪。以對寵光。

文林郎張允中該修壽皇玉牒循一資

敕具官某寶牒成書。嘗頒醴賞。汝供刀筆。亦與進官。毋曰例遷。其思所報。

前知建昌軍趙彥禮拖欠月椿錢降一官

敕具官某。盱江本江右佳郡。一人壞之。毒流至今。爾自力于政。而承積弊于二十餘年之後。給餉有闕。無所歸咎。稍鑄一秩。以儆後來。

沈合知岳州

敕具官某。岳陽據荆楚之要。郡雖小而地望實重焉。爾清約詳練。資歷寢深。惟爾兄舊鎮長沙。威望凜然。父老類能道之。試郡云初。毋忝家聲。則知共理之意。

趙不揚江西提舉

敕具官某。爾頃以吏課之優。爲郎起部。出守輔郡。蔚然有聞。江右斂散之重。俾爾持節以臨之。昆弟三人。少則俱列于儒科。今又分道而爲使者。遠有光華。宗盟之美談也。其勉爾事。以稱所蒙。

# 攻媿集卷四十

## 外制

知婺州葉翥知紹興府

敕輔郡承流久不聽尚書之履。价藩謀帥。玆又懷太守之章。允謂才難。莫先德選。具官某。智周慮表。學紹儒先。踐馭既歷三朝。侍從亦踰一紀。愛人利物。由天性之自然。足國裕民。處地官而最久。屢更劇部。深惠疲氓。盡銷愁恨。歎息之心。尤見勞來安集之政。眷惟東土。密邇行都。先帝上賓。將奉因山之役。大邦維屏。益嚴分闔之除。惟爾通材。稱予隆委。規模素定。既所臨而有聲。威信兼行。當不擾而自辦。佇聞成效。奚俟多辭。

新知紹興府倪思知婺州

敕具官某。視禁林之草。允藉通儒。分輔郡之符。俯從忱請。相攸既審。易地皆然。爾學優而醇。文麗以敏。早登宏博之選。徑上清華之途。翰苑詞垣。擅兩制絲綸之美。經帷史館。極一時筆橐之榮。擢貳儀曹。獨司邦禮。拭圭出使。握節言旋。曾坐席之未溫。俄抗章而自列。豈久勞侍從之事。遂厭直承明之廡。懷會稽太守之章。至勤再命。繼東陽隱侯之詠。去擁一麾。勉爲朕行。毋輕民事。詞人而任岳牧。初無內重之偏。宣室之

對鬼神當俟政成之後。

夔路運判陳謙湖北提刑

敕具官某。爾以君子儒。爲湖北常平使者。蠻獠披猖。省民驚擾。船粟而往。哺之。爾之職也。因攝憲臺。併任其責。就設方略。隨以撫定。朕聞而嘉之。可謂不辭難者矣。乃酌帥臣之言。姑輟夔門之役。茲庸命汝持刑本道。以慰民望。以獎爾勞。其思永圖。靖此一方。不汝忘也。

湖北提刑王謙湖南提刑

敕具官某。部使者之選。以風采爲先。所以寄吾耳目于千里之外。不欲其數易也。以爾志操不凡。居有直氣。其在郡邑。聲望翹然。持憲湖陰。正欲倚重。易節鄰部。非以便爾之私。又將于爾乎觀焉。尙勉之哉。

判太史局降授夏官大夫吳澤降授中官大夫荆大聲降授中官正劉孝榮同判局降授局令周端友並復元官

敕具官某等。天道高遠。王者欲求端于上。必有日官以司之。爾善于觀象。見謂老成。頃以不謹。嘗鑄命秩。涉期而斂法也。勿以爲宜得而忘所報。

修武郎監建康府權貨務門茅恭收趨增羨轉一官

敕具官某。權貨之在留都。歲入甚夥。增羨之賞。司關者亦預焉。進爾一官。益勉而職。建寧府浦城知縣鮑恭叔降兩官永不得與親民差遣。

敕具官某。縣令與民最親。獄事所宜深察也。爾爲大邑。以重辟告于郡。卻而復上。幾陷平民于死。迨寃狀既白。而欲便文以自解乎。外臺有言。奪汝二秩。不復使任。臨民之官。尙爲輕典也。

中大夫煥章閣待制趙彥操轉一官致仕

敕鎮五羊之地。方通持囊之班。叩九虎之關。忽上挂冠之請。是爲宗老。宜厚寵章。具官某受才素優。莅政尤敏。早參民部。旋自逸于燕閒。晚歷藩方。嘗屢騰于課最。眷南海折衝之略。升西清次對之聯。聞囹圄之屢空。見里閭之不擾。胡爲感疾。遽欲乞身。念帥閫之幾年。進文階之四品。鄭尙書之威信。日佇來歸。漢大夫之優游。諒深自得。以華晚節。以勵能臣。

帶御器械某知閣門事

敕。設上閣之官。豈惟掌朝會之事。選名門之子。抑以儲將帥之才。具官某志在事功。家傳韜略。奏最于淮陰。爲侯之地。易鎮于亞父所封之城。聞父喪而棄官。人咨其孝。承召命而引道。朝賞其忠。釋苴杖以趨班。屬囊韉而衛上。授之以仲叔圍之任。可使當公西華之言。惟子道臣道之知方。宜軍容國容之俱習。是將用汝。尙其勉旃。

武功大夫殿前司選鋒軍統制李浩總轄牧放合轉一官久任有勞轉行遙郡刺史

敕具官某。兵久不用。軍中累年勞以進。武爵率有止法。無得踰焉。以爾久任戎務。舉軍推其能。出視駟牧。善修馬政。寵以郡刺史之職。蓋異恩也。其奮事功。以圖報稱。

侍御史張叔樁權吏部侍郎

敕。朕祇膺丕緒。董正具僚。六部之分。莫如選部之爲重。小宰之事。豈應冢宰之兼行。輟而風憲之嚴。司我銓衡之舊。具官某性資凝粹。論議正平。襲永嘉之儒風。蚤收科級。守文昌之家法。雅擅鄉評。再策足于朝行。幾問津于禁路。進班柱史。君舉必書。攝事天官。吏姦無蔽。自擢居于橫榻。久肅正于南臺。當予御圖三日之初。俾爾正位貳卿之列。規模素定。要須甄拔之盡。公藻鑒益明。無使賢愚之同滯。副茲隆委。成爾脩名。

左司諫章穎侍御史

敕具官某。朕臨御之初。精求政體。正心以正朝廷。正朝廷以正百官。朕之所務也。然一朝之綱。總于憲臺。一臺之柄。屬于端公。茲得其人。他可類舉。以爾秉心堅正。燭理融明。學問之懿。察于朱邱。橫經之日。風節之峻。見于諫省。論事之際。不俟信宿。擢之南牀。其爲朕別白正邪。振舉蠹弊。使君子有所恃。小人有所畏。四方風動。而朝廷益尊。于予初政。豈曰小補之哉。

右正言黃艾左司諫

敕具官某。古者天子有諍臣七人。而後之諫官。不過一二。苟非精擇正士。何以補袞職之闕哉。朕御圖伊始。下詔以來。直言舊學之臣。聲著騎省。首命序進。以示四方。爾發藻士林。負敢言之氣。事朕宗邸。動有箴規。輟任拾遺。兼侍經幄。風采凜然。聞于中外。茲庸命汝官以諫名。予違則汝弼。汝言則予從。豈惟身處寡



過之地。庶幾海內之士。聞其風者。有樂告以善道之益焉。

國子司業李祥宗正少卿

敕具官某。爾樸茂忠恪。見推士林。頃貳司成。學者厭服。蓋平日踐履之效。是可以聲音笑貌爲哉。司宗少列位亞容臺。敍百世之本支。修累朝之史牒。惟老于文學。著述不倦者。可以當之。舉以命爾。公論惟允。勇退之志。亦可以少回矣。

吏部郎官葉適國子司業

敕具官某。國家萃天下英才而置之學。選于衆而爲之師。經術由此而明。人物由此而出。豈細故哉。朕御圖之初。思欲作新學者耳目。求當今第一流。素爲天下士所推服者。以正師席。宜莫如汝。矧茲郎潛。資望俱稱。故用之不疑。傳不云乎。善待問者如撞鐘。叩之以大則大鳴。叩之以小則小鳴。惟汝足以當此哉。

司農少卿蔡戡司農卿

敕具官某。大農本周稷之業。自漢名官以來。惟朱邑號循吏。鄭康成爲大儒。唐之段秀實以忠節自奮。官以人重。顧不信歟。爾以儒術治行。選爲少列。徊翔朝行。最爲舊人。進而爲長。雖曰序遷。益勉所長。以紹乃祖之風烈。何止爲此官之重哉。

劉光祖司農少卿

敕具官某。忠直之士。爲國之寶。本朝名臣。豈無以直道去國者。旋復召用。以至大位。此又祖宗之家法也。

況爾予之舊學相從有年。執法殿中。號稱謇諤。雖嘗引去。聖父任以外臺帥閩之寄。不使之一日家食也。茲庸命爾爲少列于大農。實爲多士先。尙過爾驅。以副朕傾後之意。

顯謨閣待制黃裳給事中

敕。眇予冲人。臨政伊始。惟我太上。知卿最深。朱邱談經。專任以輔導之事。銀臺批勅。又屬以出納之言。雖抗論而遷厥官。終留行而不使去。至今日而復用。豈人力之能爲。具官某學貫九流。識通千古。世居劍外。擅蜀士之雄文。地近關中。挾西人之勁氣。是非邪正。惟務體國。利害禍福。不知有身。久從吾游。備見爾蘊。迨此纂承之日。付之封駁之司。將求多聞。毋替諄諄之誨。不負所學。會觀謬諤之言。倚注方深。權輿于此。

新除起居郎陳傅良中書舍人

敕朕嗣膺大統。收攬羣才。朱邱賢僚。豈容居外。紫垣老手。宜俾爲真。具官某學探聖原文。追作者論議。多先儒之未發。行藏惟古人之與稽。相從兩載之餘。信爲三益之友。謂左氏真得春秋之旨。謂周官實爲太平之書。推祖宗之本心。明政事之要道。昔信其說。將行所言。首畀故官。游加新渥。矧是纂承之始。尤資播告之修。大老之居海濱。是將焉往。舊學之遯荒野。其遂來歸。式過爾驅。以副朕望。

起居舍人彭龜年中書舍人

敕。中書造命之地。實王政之所先。內史代言之官。非賢才而孰處。我有舊學。時爲名流。擢登詞垣。實預國論。具官某爲有用之學。抱軼羣之才。惟其善養之氣剛。遂使所居之官大。班分螭陛。視言動而必書。額叩

龍墀抗威顏而不撓。方朱邱橫經之日。多赤心憂國之言。迨膺超除。深允衆望。訓詞溫厚。爾其振盤詰之文。朝夕論思。爾毋廢箴規之益。尙圖忠報。奚事多辭。

將作監黃由起居郎

敕具官某。王者嗣膺丕祚。首用舊僚。非欲私我所與。而厚平日之恩。蓋將舉吾所知。以來當世之士。列爾二史。助予一人。以爾蚤冠儒科。久儀朝路。不以仕已爲意。而益進于學。不以利害爲計。而務極其言。囊封旣効忠嘉。殿陛尤加剴切。被眷知于慈辰。爲賓友于王門。迨初政之方新。與羣英而並進。入則侍螭頭之左。凡論事而直前。出則班豹尾之中。亦在法而當從。是爲爾寵。期懋予衷。

著作郎沈有開起居舍人

敕具官某。朕踐阼云初。涉道尙淺。實賴二三元老。力濟多艱。更資左右近臣。交修不逮。惟平日賓僚之舊。分一時言動之書。匪予敢私。惟爾能稱。爾詞華敏贍。學術淹通。蚤蜚場屋之聲名。久歷膠庠之師表。以著庭而兼史筆之重。由郎省而參宰掾之司。比從予遊。實自親擢。學爲可用。閱義理以滋多。中自不欺。樂講論之日益。其居柱下。密侍朕前。尙思嘉猷。以助初政。

參知政事陳騭知樞密院事

敕九五正位。方承太上之傳。二三大臣。俱極當今之選。用人由舊。錫命維新。旣久貳于政機。宜進專于省府。具官某。氣剛而不撓。德盛而有容。以博學篤志而爲世醇儒。以正色直道而致身近輔。斯謀入告。則惟

后之德。一夫不獲。則時予之辜。厚重若絳侯。而有多文之學。彌縫若如晦。故無揚己之名。朕念周業之艱。難慕漢機之周密。睠我元老。長予本兵。藉東省之猷。爲領西樞之方略。事均一體。威示四方。噫。折千里之遐衝。顧豈圖于近效。建萬世之長策。正有賴于訏謨。其務同心。以康庶事。

同知樞密院事余端禮參知政事

敕文武兩途。實歸一道。東西二府。允賴兼資。粵予菲涼。膺此付託。乃進鴻樞之貳。俾參嚴嘏之嚴。具官某。宅心粹夷。植操堅特。凜凜有大臣之體。謙謙得君子之風。壽皇知臺察之名。擢居法從。太上眷儲僚之彥。授以本兵。喟然形憂國之誠。卓爾任正君之責。言婉而切。氣勁以溫。故于宥密之司。率藉調娛之力。稽之公論。蔽自朕心。欲新政之設施。宜舊人之圖任。是資共二。有賴同寅。噫。朕方求內外之安。經理于上。爾尙慮軍民之要。彌縫其間。庶幾有成。其永無斃。

覃恩文臣承務郎以上轉官選人任并嶽廟循資定詞

敕具官某。朕奉太上之慈訓。嗣守丕圖。踐阼之初。大敷霈澤。京秩而上。咸進厥官。選人在任云。凡預選階。有官守者。皆許序進。繼

廟云。雖食祠祿。蓋將樂與士夫共起治功也。各揚乃職。以稱異恩。

文臣承務郎以上致仕定詞

敕具官某。朕仰惟太上不俟倦勤。傳祚眇躬。覃霈之頒。仕者進秩。雖致其事。亦預此恩。老吾老以及人之老。王者之仁政也。朕心庶幾焉。

端明殿學士知江陵府王蘭資政殿大學士知潭州

敕。朕嗣居九重。臨制萬國。若刺史縣令之衆。未暇究詳。惟方伯連帥之功。首當褒表。眷時元老。嘗秉鴻樞。撫荆楚者有年。易湖湘之重鎮。具官某受天間氣。爲世名臣。直節高風。真可立懦夫于百世之下。崇論宏議。將欲舉明主于三代之隆。受知兩朝。致位四輔。過江而見王導。有國何憂。舉衆而得臯陶。不仁自遠。控長江之都會。建大將之鼓旗。固邊圉以內周。宣王靈而外暢。惟予初政之急。念茲舊弼之賢。下詔求言。方期樂告。視邦選牧。有賴于蕃。惟此昭潭。時乎南服。帶洞庭而負喬嶽。扼嶺嶠而震蠻獠。藉卿威名。壯我藩翰。加以大學士之貴。用爲東諸侯之先。噫。陶公之封長沙。足倚上流之重。賈傅之對宣室。已深前席之思。尙邁十乘之行。以慰一方之望。

知常德府袁樞右文殿修撰知江陵府

敕。具官某。荆州居國上游。自古爲用武之地。謀帥之重。每嘆才難。以爾鯁亮之資。淵博之學。養氣以義。不撓不阿。有憂國愛君之心。有憤世疾邪之志。一辭禁闕。家食累年。起鎮武陵。治行昭著。寵以論議之職。以殿是邦。朕承丕圖。臨制四方。萬里之遠。謂斯民宅。生于刺史。故大明黜陟。以示好惡。由支郡而受闕寄。爾實爲初政第一選。固圉靖民。可不懋哉。

兵部尙書羅點父奉直大夫朝俊覃恩贈中散大夫

敕。朕祗荷慈謨。嗣膺大統。爰敷曠蕩之澤。以及中外之臣。矧喉舌是司。兼領典銓之重。而松楸在遠。方深

陟帖之思。乃分寵光。用賁冥漠。具官某。天資純茂。族系繁昌。早爲君子之儒。稱于里社。自樂先王之道。老矣丘園。尙及邴超。入幕之賓。不見紀騰。隔屏之坐。素多隱行。遂爲大門。茲登五品之崇。足慰九原之望。賢子方用。侯封未央。其欲綸誥之恩。繼有蜜章之渥。

參知政事陳駸該覃恩封贈

曾祖太子少保駸太子太保

敕。朕祗膺慈訓。勉紹丕圖。允賴邇臣。共濟萬幾之務。爰因惠澤。特推三世之恩。具官某。積善素深。秉心無競。恂恂有守。旣高月旦之評。坦坦無營。自樂衡門之老。侈厥餘慶。流于後昆。進參政地之崇。追賁儲僚之峻。肆由亞保。薦錫明綸。用昭寵靈。以慰冥漠。

曾祖母始興郡夫人成氏河內郡夫人

敕。朕履位之初。均福于下。有如近輔之重。可後曾門之光。具封某。生于儒家。嬪此名族。勳謹珩璜之飾。克供蘋藻之儀。是有聞孫。晚參大政。易翁源之舊壤。開河內之新封。陰報可知。寵光未艾。

祖太子少傅策太子太傅

敕。圖大宅中。方布維新之令。建極斂福。寔均共政之臣。爰舉彝章。加賁先世。具官某。履行純固。稟資粹和。福祉未央。見生子生孫之盛。人門俱勝。無慙卿慙長之名。申命九泉。遂登六傅。(案)六傅見晉書何劭傳。一本作太傅。與下句意義混。不可從茲進在前之職。用爲有後之榮。尙惟不忘。其克祗服。

祖母和義郡夫人朱氏博平郡夫人

敕。惟時近臣。翊予初政。厥有霈澤。光爾前人。具封某素稟嫺柔。能循法度。中饋攸職。宜其室家。慶源既深。有此湯沐。載啓博平之號。益崇石窠之封。是爲異恩。以詔幽窆。

父太子少師讜太子太師

敕。維予冲人。嗣大歷服。無疆惟休。均暨海宇。凡列朝籍。皆得以榮其親。矧二三大臣。顧可後歟。具官某尙友古人。爲世善士。安時處順。不求聞達。蘊蓄弗露。是宜有子。旣執政柄。寵及泉壤。義方之訓。蓋可驗矣。乃進宮師。以慰雨露之感。英靈不昧。其尙寵嘉之。

前母平樂郡夫人成氏文安郡夫人母咸寧郡夫人王氏濟陽郡夫人

敕。大寶是守。賴茲臣鄰。湛恩普覃。燕及禰廟。具封某克遵壺範。能謹婦儀。舉案事夫。聿追德曜之美。斷機教子。無愧軻親之賢。旣陟近臣。屢揚卹典。茲載疏于新寵。用加峻于小君。以寬吹棘之思。庸示漏泉之澤。妻東牟郡夫人宜氏封魯郡夫人

敕。丕緒紹隆。方履重熙之運。臣工翊贊。宜均內助之恩。庸頒鸞誥之華。以詔魚軒之貴。具封某靜專自守。儉約有聞。作配名卿。能勉以正。克主中饋。用肥其家。視夫爵以疏封。由霈恩而改命。乃疇曲阜。載錫贊書。尙迪令猷。以祗茂渥。

禮部侍郎許及之該覃恩封贈

父朝奉郎樞贈朝請郎

敕朕祇荷慈謨。嗣膺大統。爰敷曠蕩之澤。以及中外之臣。矧吾貳卿。欲寵先世。可無渙渥。以發潛光。具官某坦坦幽人。恂恂長者。惟居鄉不變其素守。而教子能知夫義方。隱行有聞。陽報如響。親見儒科之擢。蚤欣宦牒之榮。遠奉安輿。既愴九原之隔。茲持禁橐。何勝三釜之懷。超官簿以升階。冠郎曹而視秩。是爲曠典。少慰孝思。

故母安人呂氏贈令人

敕九五正位。方承與子之傳。小大羣臣。俱有榮親之典。載頌明命。以示寵光。具封某淑靜自將。柔嘉可度。孀于善士。克共蘋澗之儀。生此名卿。徒起棘薪之嘆。既更事任。遂陟禁嚴。爰疏告第之恩。以顯漏泉之澤。尙其冥漠。式克欽承。

繼母太恭人五氏封太令人

敕此下同前九五  
正位六句具封某雅著壺彝。恪循婦道。儉勤自詔。允爲中饋之賢。甘旨承顏。坐享安輿之奉。既登眉壽。茂擁多祺。乃因霈澤之行。超示疏封之寵。其祇朕命。益侈爾榮。

故妻安人洪氏贈令人

敕凡我從臣。均此大需。爰及閨房之秀。並膺綸綍之華。具封某鍾慶相門。流芳女範。蚤從名士。將仰望于終身。胡嗇永年。曾不登于中壽。迨躋顯用。嘗賁卹章。茲超命服之榮。用錫幽扁之寵。姑從告第。以慰悼亡。



妻安人潘氏封令人

敕。此下同凡我從臣四句。

具封某稟姿靜專。處己冲素。動遵女戒。克循待傳之言。躬習婦儀。果見從夫之貴。治組紉而有度。奉溫清以尤恭。象服是宜。鸞牋增寵。其服恩光之渥。以彰內助之賢。

煥章閣直學士中奉大夫邱密磨勘轉官

敕。具嚴銓法。所以示百僚之公。優待從班。猶不忘三載之效。爰頒命綽。俾進文階。具官某以拔萃之才。負爽邦之望。進貳民曹之重心。計有餘出。臨井絡之區。威名益遠。方謀陟典。適會年勞。遂升漢大夫之名。用爲蜀太守之寵。其祇渙渥。嗣有殊褒。

見任侍從該覃恩轉官

兵部尙書羅點以下首尾詞同。

敕。朕嗣膺鴻祚。祇通燕謀。九五正位之尊。何德以稱。二百餘年之業。得人乃興。眷惟禁路之英。皆我慈皇之舊。爰因覃霈。首示優恩。具官某以經世之才。爲致君之學。早登朝著。益顯時名。久居侍從之班。務竭論思之蘊。末光之依日月。旣親遇于三朝。聽履而上星辰。足儀刑于百辟。方藉嘉謀之告。亟升命秩之華。其務同寅。以光初政。

工部尙書趙彥逾

具官某砥礪廉隅。磨礪事業。挺身徇國。是爲貴戚之卿。正色立朝。遂陟文昌之貴。

翰林學士李獻

具官某德必有言。文斯貫道。蚤儀編序。徑登紫囊之華。進直鸞坡。久被金蓮之寵。

刑部尙書京鏗

具官某學博而智明。才高而用大。出分方面。曾遠憺于王靈。入踐文昌。實坐司夫邦典。

兵部侍郎耿秉

具官某持論不阿。修身無玷。參華武部。久儀法從之班。共二瑣闈。克振塗歸之職。

工部侍郎謝深甫

具官某忠結主知。才周世務。雍容禁裏。屢形批勅之風。潤色邦條。雅得稽經之意。

給事中黃裳

具官某性稟精忠。學窮奧義。潛藩勸講。賴誘進以最深。瑣闈除官。冀塗歸之如昔。

中書舍人陳傅良彭龜年

具官某學貫九流。名滿四海。彭龜年云。學識純明。謀猷深遠。橫經朱邸。遂依日月之光。掌制西垣。期鼓風雷之號。

吏部侍郎張叔椿

具官某迪德粹和。受才膚敏。久居橫榻。實高風憲之嚴。茲任小天。允致銓衡之重。

戶部侍郎袁說友

具官某器度恢宏。風神峻整。宣威天邑。政允號于神明。掌計民曹。道深知乎取予。

禮部侍郎許及之

具官某智術疏通。詞章精敏。拾遺諫省。雅有諍臣之風。掌禮儀曹。克守先王之典。

起居郎黃由等該覃恩轉官

起居郎黃由起居舍人沈有開以下首尾  
詞同

敕具官某。朕嗣膺鴻祚。祇遙燕謀。九五正位之尊。何德以稱。二百餘年之業。得人乃興。眷惟近臣。實有舊學。爰因覃霈。首示優恩。爾早負時名。進多朝望。曳裾王邸。熟陳六藝之格言。載筆殿坳。允謂三長之良史。方藉嘉謨之益。亟升命秩之華。其務同寅。以光初政。

秘書少監兼權吏部侍郎孫逢吉

爾學貫古今。識分邪正。比當言責。是為諫諍之臣。茲典選曹。雅善銓衡之職。

侍御史章穎左司諫黃艾

爾早陟殊科。進多雅望。曳裾王邸。熟陳六藝之精微。執法憲臺。黃艾云。澤  
笏諫垣。獨振一時之風采。

監察御史并卿監郎官該覃恩轉官定詞

敕具官某。朕嗣服云初。求賢以自助。仰惟慈皇招徠衆俊。實在周行。殆留以遺朕也。覃霈之恩。其可後乎。爾職在六察。秘書監云。擢長道山。卿云。列  
在月卿。郎官云。列在郎曹。序進一階。往其祇命。尚思所以助我者以報。

在 外 大 中 大 夫 以 上 官 知 州 府 該 覃 恩 轉 官

顯 謨 閣 學 士 中 大 夫 知 紹 興 府 葉 翥 以下首尾 詞同

敕。朕奉 上皇之慈訓。承列聖之丕圖。需乃 渙恩。覃于海宇。矧是 文昌之舊。往宣屏翰之勞。爰錫明縉。俾躋命秩。具官 某材猷通敏。德度恢洪。聽履禁途。坐閱十年之久。分 廳帥閫。實為九牧之先。方歌求助之詩。仍加進律之寵。 在漢比千石之秩。于今為四品之階。其務欽承。益思 猶告。

煥 章 閣 學 士 大 中 大 夫 知 明 州 何 澹

矧惟中執法之舊。往為東諸侯之行。爰錫明縉。俾躋命秩。具官 某學探蘊奧。名冠倫魁。入總臺綱。見藜藿之不採。出臨制閫。致波濤之不驚。方歌求助之詩。仍 加進秩之寵。在隋始大夫之號。于今正三品之階。

通 議 大 夫 煥 章 閣 待 制 知 建 寧 府 陳 居 仁

矧是詞臣之舊。往宣藩服之勞。爰錫明縉。俾躋命秩。具官 某稟資端亮。秉德忠純。擅西掖之雄文。最宜為 誥。奏南邦之最課。尤號近民。

中 大 夫 煥 章 閣 待 制 知 鄂 州 王 信

矧是瑣闈之舊。往宣藩服之勞。爰錫明縉。俾躋命秩。具官 某詞源浩博。才刃恢餘。西掖東臺。嘗備更于清 選。武昌夏口。正倚重于上游。

中 奉 大 夫 煥 章 閣 待 制 知 鎮 江 府 馬 大 同

矧是文昌之舊。往宣屏翰之勞。爰錫明縉。俾躋命秩。具官某性資沈毅。政術闡明。持橐禁途。嘗主民曹之大計。分麾京口。實當天塹之要津。方歌求助之時。仍加進秩之寵。昔倪寬則以誦書而擢。若晁錯則由對策而除。

龍圖閣學士正議大夫知建康府鄭僑

具官某學通乎百氏。文根乎六經。領豹尾之班。雅有公臺之望。分麟符之寄。實爲方面之雄。

徵猷閣學士中大夫知襄陽府張杓

具官某才高一世。氣壓萬夫。聽履漢廷。有張京兆之英譽。分麾峴首。追羊太傅之流風。

中大夫敷文閣待制知建寧府單夔

具官某才猷膚敏。政術疏通。持橐禁途。坐閱十九年之久。分麾侯服。屢稱二千石之良。

煥章閣直學士中大夫知興元府章森

具官某風儀峻整。學術疏通。持橐禁途。嘗典銓衡之重。分麾帥閫。屢專方面之雄。

大中大夫敷文閣待制知瀘州吳總

具官某家聲素著。政術甚優。四松而班殿廷。實祝從臣之清貴。五月而渡瀘水。正資邊徼之威名。

大中大夫煥章閣待制知太平州蔣繼周

具官某才名素著。經術尤高。憲府宣威。尙想聞于風采。侯藩共理。亦屢賦于中和。

寶文閣學士通奉大夫知遂寧府宇文价

知澶州府閣  
若舒同詞

具官某稟資庸敏植行粹和應履禁途圍若舒云持藥禁途嘗出漢廷之右擁麾帥閫屢登蜀道之難

攻媿集卷四十一

外制

在外大中大夫以上任宮觀該覃恩轉官

龍圖閣學士正奉大夫韓彥直

以下首尾  
詞同

敕朕奉上皇之慈訓承列聖之丕圖。需乃渙恩覃于海宇。矧是文昌之舊。屢從閒燕之居。爰錫明縉。俾躋命秩。具官某才周庶務。仕歷四朝。進長地官。職論思而最久。退安真館。奉趨謁以甚恭。方歌求助之詩。仍加進律之寵。爰陟文階之等。遂冠侍臣之班。其務欽承。益思猶告。

煥章閣直學士朝奉大夫謝諤

具官某純誠自守。全德兼容。聽履而上星辰。已高勇退之節。把麾而去江海。竟尋嘉遯之風。

通奉大夫顯謨閣待制陳峴

矧是瑣闈之舊。久從藥館之居。爰錫明縉。俾躋命秩。具官某天資通敏。門第高華。入處東臺。早饒簪橐之列。出臨西蜀。遂安香火之閒。

中奉大夫敷文閣待制吳益

矧惟次對之舊。久遂真祠之游。爰錫明縉。俾躋命秩。具官某稟資和粹。植行端良。壯歲逢辰。已列甘泉之侍。高懷去國。惟求藥館之閒。

大中大夫煥章閣待制劉國端

矧是論思之舊。久從閒燕之居。爰錫明縉。俾躋命秩。具官某秉心無競。持論不阿。橫榻宣威。徑上甘泉之列。西清寓職。遂安藥館之游。

大中大夫敷文閣待制賈選

具官某才周世務。識照事機。憲部持平。蚤列甘泉之侍。闕山報政。遂安藥館之游。

在外大中大夫以上致仕官該覃恩轉官

龍圖閣學士通奉大夫張大經以下首尾詞同

敕。朕仰奉慈謨。嗣膺聖緒。肆頒大霽。覃及萬邦。當代英才。雖賜環而畢至。前朝故老。乃上印以言歸。顧注想之方深。豈渙恩之可後。具官某純明而有執。亮直而能容。諫大夫之伏蒲。朝行甚肅。大常伯之聽履。物望愈高。挹神虎挂冠之風。寓龍馬負圖之職。居然壽考。尤矣典刑。比歌求助之詩。庶有乞言之福。爰陟文階之峻。用為晚節之華。其服寵光。益介繁祉。

敷文閣直學士正奉大夫汪大猷

具官某性通而自節。道廣而能周。雍容簪橐之班。凡有謀而必告。出入麾符之後。乃未老而求閒。辭榮上



北闕之章。寓職峻西清之舊。

正議大夫寶文閣待制沈樞

具官某風猷高邁。政術淹通。揚歷禁嚴。嘗任宮端之重。周旋郡寄。遂專連帥之雄。聯次對之清班。樂辭榮之嘉遜。

朝散大夫敷文閣待制李昌圖

具官某才周通變。氣稟直方。登蜀道之難。屢稱膚使。出漢廷之右。遂列從臣。通次對之清班。樂辭榮之嘉遜。

中奉大夫萬鍾直龍圖閣守本官致仕

敕具官某。朝廷用人。豈容其無故而去。臣子納祿。或遂其知止之高。爾以文奮身。以才用世。外臨兩郡。既治行之有聞。內列九卿。非宦游之不達。方將執筆于左螭之陛。乃欲掛冠于神虎之門。畀以河圖之華。成而縣上之隱。是或一道。毋有遐心。

著作郎李唐卿江東提舉太常丞呂棐湖北提舉

敕具官某等。朕惟一人之聰明。不能周知天下之故。分道遣使。不惟寄耳目于外。臨遣朝士。又得以宣布予之德意。志慮于民。常平以斂散爲職。括山澤之利。事顧不重哉。爾唐卿心平而論篤。久于著作之庭。爾棐氣勁而言忠。丞于禮樂之地。俱以儒學老成。見于有用。治縣稱最。真彼周行。輟從郎曹。將我使指。一往

大江之左。一往重湖之北。各揚乃職。朕不汝忘。

知建康府鄭僑吏部尙書

敕金陵爲王者之宅。固有藉于保釐。吏部有天官之名。尤欲精于流品。粵求舊德。復領從班。具官某。執德不回。秉心無競。舉明主于三代之上。倡諸儒以六經之文。論思不憚于犯顏。封駁尤高于批勅。出臨鄉部。載守留都。肆纂承丕祚之初。乃董正治官之日。亟頒召節。方欲聽尙書之履聲。盡付銓曹。豈令書干木之紙尾。佇聞猷告。其疾爾驅。

太常少卿詹體仁太府卿

敕具官某。容臺之禮樂。外府之財用。其實皆政也。後世治出于二。而後有流品之分。然禮以養人爲本。又曰樂以殖財。惟知古道者能言之。爾好古而志于用。頃由道山冊府。出爲常平使者。遠護軍儲。能聲益昭。歸處少列。明禮修樂。實惟其長。序進卿長。上以佐民曹之調度。下以梘有司之出納。以若之才。不勞而辦。朕將思所以用汝者焉。

監察御史曾三復太常少卿

敕具官某。憲府設屬。以六察爲重。容臺少列。非七寺之比。壽皇厭朝士之數易。御史喪廡。或二三年而不遷。若其察事能審。敢言不阿。擢居禮樂之司。不以爲吝。士亦以此競勸。朕之用爾。蓋此道也。爾氣剛而克和。才敏而能詳。其在周行。表表自立。報政于輔郡。簡僚于南牀。助正臺綱。閱時最久。朕知其有靖共之譽。

故拔而用之。禮方從宜。大饗伊邇。引經據古。使禮行于上。而人孚于下。朕于是望汝焉。

李壁祕書省正字

敕具官某。惟爾父爾兄。並游英俊之躔。有臯綬之遺風。無歆向之異論。能繼厥後。爾惟其人。自登世科。亟實冊府。銜卹萬里。素冠三年。召收來歸。復畀舊物。豈惟以是正簡冊望汝。史事甚重。爾有家傳。朕將于汝乎求之。

知樞密院事趙汝愚該覃恩封贈

曾祖母太保士慮少保

敕朕祇膺慈訓。勉紹丕圖。允賴邇臣。共濟萬幾之務。爰因惠澤。特推三世之恩。具官某宅慶璇霄。聯芳寶牒。少而從宦。雖官政之莫施。孝以宜家。諒躬行之無媿。侈厥餘福。流于後昆。進參宥府之崇。嘗資儲察之峻。茲疇故典。遂陟孤卿。用昭寵光。以慰冥漠。

曾祖母文安郡夫人龔氏崇國夫人

敕朕履位云初。均福于下。有如近輔之重。可後曾門之光。具封某生于儒家。嬪我皇族。動謹珩璜之飾。克共蘋藻之儀。爰及諸孫。進居兩地。遂啓封于大國。以錫命于小君。陰報可知。寵光未艾。

祖太子太傅不求少傅

敕圖大宅中。方布維新之令。建極斂福。實均共政之臣。爰舉彝章。加賁先世。具官某履行純固。稟資粹和。

生長承平。及見累朝之全盛。始終信厚。遂臻後葉之繁昌。進秩青宮。申命黃壤。茲以湛恩之布。徑躋亞傅之榮。尚惟不忘。其克祗服。

祖母濟陽郡夫人晁氏濮國夫人

敕。惟時近臣。翊予初政。厥有霈澤。光爾前人。具封某素稟嬌柔。能循法度。中饋攸職。宜其室家。慶源旣深。有此湯沐。載啓濮陽之號。益崇石筭之封。是爲異恩。以詔幽窆。

父太子太師善應少師

敕。維予冲人。嗣大歷服。無疆惟休。均暨海宇。凡列朝籍。皆得以榮其親。矧二三大臣。顧可後歟。具官某孝友實根于天稟。躬行無愧于古人。爲吾宗盟之表。善言善行。稱于搢紳。卽世之後。隱然不忘。是宜其存子也。寵及泉壤。遂冠六傅。茲以周官貳公之秩。以告于第。且以慰雨露之感。英靈不昧。其尙寵嘉。

母饒陽郡夫人李氏申國夫人

敕。大寶嗣守。賴茲臣鄰。湛恩普覃。燕及禰廟。具封某克遵壺範。能謹婦儀。四德備全。協山水之高趣。三遷垂教。爲廊廟之鉅賢。屢錫恩封。以昭寵遇。乃開申伯之國。載徹饒陽之封。以寬吹棘之思。庸示滌泉之澤。

妻通義郡夫人徐氏安定郡夫人

敕。丕緒紹隆。方履重熙之運。臣工翊贊。宜均內助之恩。具封某婉孌自將。柔嘉可度。克相夫子。遂爲當代之名卿。乃嗇天年。不見機庭之異數。豈敷寵渥。豈間幽明。用疇涇水之封。載徹眉山之舊。尙惟英爽。欽此。

卹章。

簽書樞密院事羅點初除封贈

曾祖起太子少保

敕延登邇臣。翊贊初政。維時偉望。進參宥府之嚴。庸錫明綸。以厚會門之寵。具官某持身無玷。制行有嚴。寡悔寡尤。自潔幽人之履。以嗣以續。遂開餘慶之源。厥聞惟彰。其後乃大。爰畀青宮之秩。用疏黃壤之恩。尙惟不忘。其克祗服。

曾祖母陳氏臨川郡夫人

敕參宥密之司。是謂百僚之表。煥顯揚之典。宜加三世之榮。具封某婦德素充。姆儀尤備。柏舟自誓。知勤苦以成家。彤管有光。篤義方而教子。至孫曾而遂顯。信陰報之不誣。錫命小君。疏封鄉郡。以修漏泉之澤。以彰告第之恩。

祖琢太子少傅

敕士有積德在躬。弗見于用。施及後嗣。追榮厥先于百年之後。豈人力所能致哉。具官某孝友天稟。義概素篤。人不聞于其昆弟之言。深沈不二。安分知足。長者之號。著于鄉黨。積此慶羨。篤生樞臣。申命九泉。遂登東儲六傅之秩。如有知也。庶克自慰。

祖母鄧氏新興郡夫人

敕登用大臣。所以贊廟謨也。錫命之初。則必有以寵其先世。又所以示優典也。具封某勤儉柔淑。如古賢婦。克相夫子。以廣義風。爲族嫺之所依賴。含飴之愛。素篤于生前。雖不及親見其貴。而湯沐之頒。方來未艾。榮亦至矣。新興名邦。用賁冥漠。惟爾靈其預享之。

父贈中散大夫朝俊太子少師

敕積厚流光。旣陟機庭之峻。位高寵厚。肆崇禰廟之恩。厥有故常。式昭渙渥。具官某操履純固。性資靖夷。共被對床。素深同氣之愛。指困倒廩。尤高周急之風。是鍾令子之賢。親見儒科之擢。速超登于近著。嘗屢被于卹章。進位宮師。疏榮泉壤。庸示教忠之效。庶寬追遠之思。

母齊安郡夫人繆氏封通義郡夫人

敕遴選名儒。密贊紫樞之貴。推恩賢母。式頒鸞誥之華。具封某性秉賢明。動循鑒戒。從夫協趣。克共蘋澗之儀。教子有方。首擢桂林之秀。承顏甚樂。就養有年。受福祉而未央。見寵光之狎至。茲易眉山之號。用崇石窹之封。其服異恩。益介遐壽。

妻贈淑人黃氏永嘉郡夫人

敕進秉事樞。實倚朝廷之重。載疏湯沐。以旌閨闈之賢。具封某稟姿懿柔。處己莊靜。毓慶儒族。知女則之不踰。作配名卿。循婦儀而克謹。云何不淑。弗見顯庸。茲疇甌海之雄。用錫鸞牋之寵。姑從告第。少慰悼亡。妻淑人陳氏封咸安郡夫人

敕進秉事樞。實倚朝廷之重。載疏湯沐。以旌閨闈之賢。具封某鍾慶相門。流芳女範。無違夫子。形鵲巢積累之風。宜其家人。有鳴鳩均一之德。克謹旨甘之奉。居惟法度之循。茲開名郡之封。用錫贊書之寵。其祇異渥。益懋芳猷。

中書舍人彭龜年兼侍講

敕。朕自臨帝位。首闢經帷。詳延舊學之賢。不改潛藩之舊。具官某始以德選。久從吾游。素知朕意之所安。況有詔書之備列。不待多訓。自應具知。惟孟軻所著七篇之書。非戰國以來餘子所及。蓋嘗三復其說。間有一得于中。若知言養氣之難。存心盡性之妙。人無不善。聖可踐形。正須反覆屢陳。使予通徹無蔽。若夫爵祿之制。井地之規。凡諸所傳。皆我當講。食云則食。坐云則坐。朕當審尊賢之方。義莫不義。仁莫不仁。爾其務正君之學。

給事中黃裳禮部尙書

敕。朕嗣膺大統。首擢舊僚。然建安七子之賢。先推徐幹。商山四皓之盛。最數黃公。徑躋八座之崇。庸侈一時之盛。具官某學足以充其性。辯足以達其心。貫穿經史之言。而纒纒可聽。論議古今之變。而歷歷如睹。自予幼學。屢得良師。若夫上皇委任之專。潛邸游從之久。無間于我。未有如卿。規過舉則何止血山之言。執正道則不數邪蒿之說。開性天之所蔽。知學力之自來。幸不容甘盤遯野之行。是宜被伯夷典禮之命。孺子王矣。方夕惕以憂勤。良言旨哉。尤日資于獻納。其祇予訓。益勉爾忠。

著作佐郎王容范仲黼並著作郎秘書郎王爽校書郎蔡幼學並著作佐郎

敕具官某等學士大夫以道山册府比之蓬萊瀛洲之勝而著作之庭又其高選也爾容學博而文優爾仲黼忠純而意篤既皆升處其長爽之遠業幼學之英才又均使爲之佐或以倫魁而聲稱昭于時或以名門而學問世其家是皆稱此選者朕篤意人材共興治功公卿將于此乎取何止以史事而望汝哉

秘書省正字顏械秘書郎項安世吳獵並校書郎

敕具官某等比歲一日給札而得三俊館閣之盛舉也然秀穎之才將于此乎養之以待用若械之聲名發于上庠獵之才略著于劇縣安世之節概又士論之所推是三人者不惟老于文學又俱練于世故舉而用之何所不可況年皆自強而艾固無俟乎菁莪之育也茲命械典中秘書獵與安世爲校讎之職姑以序遷朕將有以用汝焉

浙西提刑黃通湖南運判江東運副傅伯壽浙西提刑

敕具官某等朕分道遣使以寄耳目于外地有遠近職有劇易選任之意則無不均爾通以諒直之姿抗澄清之志使于近畿威望甚聳引疾求退故畀爾以湖外漕計少休其勞爾伯壽以精敏之才在文章之選使于江左職業日修惜其久外故授爾以畿甸臬事引以自近然飛輓讞議二者俱重事也一日不理則必有受其弊者其各勉旃以稱予選

知樞密院事陳騏初除封贈



曾祖太子太保數少保

敕朕嗣守大寶。凜乎重器。所賴左右大臣。輔其不逮。乃由政地。進陟機庭。追榮厥先。是有彝典。具官某。隱德不耀。躬行有餘。孫子相承。代傳清白之訓。施及三世。遂登廟堂。推恩泉壤。至于再三。是必有以致此也。茲舉周官孤卿之秩。以告于第。尙惟歆承嘉命。佑爾後人。

曾祖母河內郡夫人成氏滕國夫人

敕夫人之號。古者謂之小君。歷觀在昔。蓋未有無因而得之者也。具封某躬節儉之行。有柔嘉之德。克相夫子。以肥其家。陰功所昭。至于孫曾。而後見。湯沐疏寵。蓋嘗歷始。與河內之郡。今茲封國。間于齊楚。燕幾冥漠。其克自慰。

祖太子太傅策少傅

敕。舉士大夫。必知尊祖。非獨禮典之攸尙。至于爲世顯人。往往推述先世之所自。隱德彰著。其應不虛。具官某。出太丘之華胄。生赤城之儒族。棲遲衡泌。不以利欲貳其心。躬行之篤。見信鄉黨。雖不及施用于世。而積厚流光。屢被追榮之典。茲登亞傅。品秩益崇。如有知也。可以無憾。

祖母博平郡夫人朱氏崇國夫人

敕。婦人之爵。必從夫子。若夫異恩之頒。加賁王母。非二府大臣。則不預此。具封某。動遵圖史。雅習組紉。婦道甚飭。隱然朱陳之好也。含飴之愛。素篤。雖不及親見其貴。而積善之效。乃暴白而不可掩。疏封一國。以

爲廟室之光。

父太子太師諱少師

敕陳氏著姓自媯汭之後歷三代建國不絕漢以來多名卿大夫百世相望君子之澤未泯亦可謂盛矣具官某以隱逸遂其性以詩禮訓其子內行之積既有以大其門閭而教忠之效卒爲朝廷之端士存歿雖異哀榮則均夫三孤之長貳公洪化有子如此遂申命于九泉豈惟慰爾子深長之思亦所以示予體貌之意。

前母文安郡夫人成氏杞國夫人母濟陽郡夫人王氏信國夫人

敕延登樞臣所以贊廟謨也錫命之初必有以寵其先世又所以示恩典也具封某稟姿婉孌處己儉約有光彤管之訓不愧采蘋之詩是有賢子爲吾近輔副筭六珈屢頒石窀之封矣茲徹沐邑改命于杞伯所都之地王氏云命于廣信之區以勸天下之爲人婦者

妻魯郡夫人宣氏封魏郡夫人

敕朕初膺丕祚晉用近弼惟東西二府兼以任之夙夜匪懈是可丕厚其內助之恩乎具封某性資賢明能循法度歸于名士用勤儉以起其家閭闔之政不以累焉使得一意精白以承休德是足嘉者茲啓大名之郡以詔予寵其尙祗服永綏燕譽

知樞密院事陳駉該覃恩轉官

敕。朕祇荷慈謨。欽承丕緒。萬幾之務。每懼弗堪。共政之臣。實資夾輔。因霽恩而申命。覽遜牘以力辭。序進一階。僅同百辟。具官某。忱恂而堅正。渾厚而溫恭。久處從班。以嘉謀而入告。自居宥府。任大事以不疑。比當內禪之初。嘗求小愆之助。善調庶事。動懷永圖。執義示公。惟知議軍國之利害。忘身徇主。豈復計官資之崇卑。乃詔攸司。俾行故事。不已循墻之避。遂忘反汗之嫌。矧東府彌縫之是兼。尤當代觀瞻之所繫。姑循撝謙之志。稍行進律之褒。噫。文武兼資。尙深思于並用。內外無患。當益勉于交修。惟肩乃心。以翊予治。參知政事余端禮。該覃恩轉官。

敕。朕以寡昧之資。傳泰安之祚。既登九五之正位。允賴二三之大臣。盍因覃霽以疏恩。終以謙辭而改命。具官某。崇深而有裕。莊肅而能容。幼學壯行。終始勿渝。一節出藩。入從。精白不形二心。比參鴻樞。實贊初政。俾進居于東府。仍兼領于宥廷。一日萬幾之繁。既調娛而曲當。三軍五兵之問。又該綜以無遺。雖官簿之當升。曾身謀之不顧。命由中出。事則公行。何陳義之益高。乃抗章而不已。姑徇三辭之請。僅升一秩之華。噫。訐謖遠猶。乃所望于賢輔。高爵厚祿。豈有吝于予懷。其尙欽承。以副隆委。

四川制置使邱燾煥章閣學士再任

敕。乘乾德以御圖。始受四方之籍。念坤維之作牧。久分一面之權。眷威惠之並行。豈恩榮之可後。寵加延閣。因任帥垣。具官某。道廣而能周。才高而善下。躬履冰霜之操。手揮河漢之文。握節擁麾。所在著神明之政。簪筆持橐。周行推仁義之言。頃出鎮于成都。實總臨于諸道。先聲所暨。遠俗自孚。瀘川除暴之餘。施賞

刑而曲當。武興闕帥之久。藉方略以無虞。兵民無不歸心。奸宄爲之破膽。封陲宴若。政績炳然。東西六十州。政違號令。幅員數千里。燕及羌髻。寬朝廷之顧憂。信京師之流福。堯章增煥。正學士之清班。蜀道借留。慰吾民之素望。示予隆瞻。表爾異能。德裕籌邊。何止山川之洞見。孔明識治。或言禮樂之可興。益懋前功。以需登用。

朱熹煥章閣待制侍講

敕。朕初承大統。未暇他圖。首開經幃。詳延學士。眷儒宗之在外。願召節以趣歸。徑登從班。以重吾道。具官某。發六經之蘊。窮百氏之源。其在兩朝。未爲不用。至今四海。猶謂多奇。擢之次對之班。處以邇英之列。若程頤之在元祐。如尹焞之于紹興。副吾尊德樂義之勤。究爾正心誠意之說。豈惟慰滿乎士論。直將增益夫朕躬。非不知政化方行。帥垣有賴。試望之于馮翊。不如置之本朝。召賈傳于長沙。自當待以前席。慰茲渴想。望爾遣驅。

翰林學士李燾寶文閣學士知婺州

敕。登鼉戶以摛文。久資潤色。分虎符而出守。有賴蕃宣。中外雖殊。眷倚無間。具官某。性資淵靜。學問該通。視八代文章之工。欲齊驅于藝苑。極三朝辭命之選。幾獨步于禁林。周旋十年。終始一致。古事今事。問無不知。公門私門。行皆可述。方進遷于翰長。何遽動夫歸思。寵西清學士之班。仍寓宸奎之職。爲東方諸侯之長。更當寶婺之躔。是誠岳牧之用人。宜有江山之爲助。徒得君重。其爲朕行。勉著民庸。以觀儒效。

檢正應孟明太府卿

敕具官某。爾以純一之德。惻怛之誠。見于牧人御衆之間。備著愛民利物之效。召由帥闕。徧儀宰掾。蓋朝列之老成。士林之標表也。外府上佐大農之調度。下梘有司之出納。卿士惟月。實艱其選舉。以命之。公議允諧。問津要途。自茲始矣。

右司徐誼中書門下省檢正諸房公事吏部郎中錢象祖右司刑部郎中沈作賓檢詳

敕具官某等。朕初政是圖。惟二三大臣夾輔之賴。樞機至重。當先其大者。豈可以細故縈之。于是詳擇掾屬。以次而遷。爾誼深沈而善謀。爾象祖詳審而無滯。爾作賓在郎曹有通敏之稱。其爲朕簡節。疏目清東西府之務。俾吾大臣。惟振綱挈領。以贊予遠猷。則爾爲稱職矣。

吏部郎官李沐將作監

敕具官某。東郡李固。好學尋師。同業不知爲司徒郃之子。其所成就。復爲李公。爾以輔臣之子。退然寒生。蚤擢甲科。仕進甚緩。文敏而蔚。追企古作。郎潛旣久。避遠繁劇。處之繕監。以遂其志。素尙如此。遠業未可量也。

軍器監丞汪梓倉部郎中大理寺丞周秘刑部郎官

敕具官某等。列曹爲郎。其選俱重。非治郡有聲績者不預焉。國家行之幾三十年。弗可改也已。爾梓博涉文學。有志事功。出守都梁。邊防甚飭。爾秘明習憲法。恪意操守。濡須之政。田里晏安。況俱以名臣之子。嘗

長。在朝列。奉最而歸。宜登茲選。肆令並命。以究爾能。積貯者天下之命。寬仁者累聖之規。深體至懷。各贊而

兵部侍郎耿秉煥章閣待制知太平州

敕。入而奉上。爲言語侍從之臣。出則殿邦。任蕃宣屏翰之寄。士之從宦。是爲通顯。國之用人。初無重輕。第于臨遣之間。終惜老成之去。具官某天資。夔亮政術。精詳自其居下位之時。已有澤斯民之志。功利及物。旣所至而可稱。懇惻愛君。凡有猷而必告。甫上甘泉之列。亟求故里之歸。旋即賜環。復令持橐。爲眞武部。固有賴于論思。攝事瑣闥。尤見推于抗直。比力祈于補外。亦深察其由中。畀以當塗。眞是太平之官府。寵之次對。仍聯兩禁之清班。用昭眷懷。增重侯度。訪民晏之疾苦。諒無假于訓辭。控天塹之要衝。尙往圖于方略。勿以在遠而忘獻言。

大宗正丞李大性軍器少監兼權司封郎官

敕具官某。朝士之職優而事簡者。無如二監。非所以處才者。然而銓序人物。具有差等。不可廢也。爾一門競爽。刻意記問。出而丞邊郡。入而筮周行。心計有餘。遇事多辦。進貳戎監。仍攝郎曹。益務靖共。以俟選擇。

大理寺丞彭演大宗正丞

敕具官某。朕惟國家本支百世。繁衍盛大。高出近古。旣擇屬近行尊之賢者。以糾合宗盟。又選學士大夫。以貳其事。職雖清簡。不以輕畀也。以爾經術該綜。吏事精明。丞于外府。于廷尉踐揚。旣久而後登。此蓋亞

于三丞之選。仕益進矣。優游養望。其進未央。

大理司直朱致民大理寺丞陳樸大理司直

敕具官某。廷尉天下之平。而國家設屬爲尤備。囚徒之聽。自昔以吉士臨之。奏當之成。今又使分董而察焉。以爾致民。儒學老成。久預臬事。故俾升而爲丞。爾樸才具資品。皆應近制。故以爲邦之司直。朕嗣服之始。專以祖宗家法爲務。雖罔兼于庶獄。懼不獲于一夫。各旣乃心。毋懈于位。

太府卿詹體仁直龍圖閣知福州

敕具官某。朕覽長樂之志。知其地大物阜。眞東南一都會也。帥守掄才。初政爲急。以爾學問該洽。性識深明。試之劇繁。所在辦治。入爲九卿。嚮于用矣。願歸閩部。求便其私。徑疏畫繡之榮。仍畀河圖之直。跨州連邑。要風氣之不殊。並海負山。賴威名而爲重。倚觀政績。以究爾能。

廣西運判張釜直祕閣知廣州

敕具官某。朕臨御萬國。一視同仁。嶺海之遠。待猶幾旬。矧番禺重鎮。實控南服。謀帥之際。其何可輕。以爾紹興舊弼之孫。以家學登世科。潤飾吏事。所在稱辦。湖湘明斂散之宜。廣右謹將輸之要。就移五筦之長。以當一面之權。寓直道山。以爲爾寵。爾其填撫遠氓。招徠海賈。斥貪殘。獎廉介。以稱予倚任之意。是惟休哉。

知建寧府陳居仁知鎮江府

敕由詞掖以偃藩。久騰善最。分輔邦而易鎮。用獎賢勞。宜錫明縉。以昭寵數。具官某。風猷凝粹。心地平夷。識者嘆其遠到之資。望而知爲大度之士。文華緯國。久從鳳沼。以代言。愷弟宜民。屢以虎符而出守。恩威並用。寬猛適時。不惟人樂其中。和所至歲。爲之登熟。眷茲京口。控彼江津。城郭增雄。有山川之映發。兵民雜處。無牒訴之浩繁。屬早魃之爲災。賴賢侯之勤撫。毋庸臨遣。亟望遄驅。坐理南徐。其首修夫荒政。時登北固。尙有賴于良籌。惟服訓詞。嗣圖褒表。

廬州安溪寨蕃官王鑒男天麟承襲補承信郎

敕某。國家填撫萬邦。燕及方外。惟爾父祖。恭順相傳。爾之承襲。請命于朝。武爵之頒。益務忠謹。

江西運判趙鞏直顯謨閣知隆興府

敕具官某。國家選侯甚重。謀帥尤艱。旣懲數易之繁。重戒迎新之費。就移使節。俾正帥垣。爾受才甚高。得譽最早。以文學之彥。爲慈惠之師。其在合肥。極論淮錢之弊。迨移夔子。載言蜀戍之詳。主漕計以宣勞。總邦條而攝事。撫綏凋瘵。賑救凶災。因江西頌章侯之言。念河內借寇君之意。徑令洗印。以遂開藩。俟訖外庸。成爾歸志。

沈清臣江東提舉

敕具官某。士有自重其身。而輕視軒冕。嘉遷于世。而獨樂山林。是雖出于一概。較之浮競者。相去遠矣。此有國者之所當與也。爾以古學爲任。不計時之用舍。頃游館學。從予潛藩。儼然自持。古之畏友也。茲予纂



紹念爾退閒。起以江左之節。用慰家食之久。其尙少安。以俟恩渥。

中書舍人蔡幼學兼侍讀

以下二首。嘉定元年以吏部尙書兼翰林。偶西掖無兼員。用故事行詞。併附于此。

敕。春秋天子之事。具存一國之書。筆削聖人之公。實爲萬世之法。朕久勤講貫。期廣見聞。茲擇名儒。共論斯道。具官某。深知經旨。素有師承。未冠而擅倫魁。士皆取則。既壯而登臚仕。人以爲遲。近升禁路之華。庸代王言之重。予欲旁通夫六藝。豈容弗措于一辭。所以至日昃而不遑。庶幾學古訓而有獲。懲惡勸善。其力究于微言。考古驗今。將益明于大體。

蔡幼學講詩終篇轉官

敕。朕踐阼十五載。尤先講貫之勤。誦詩三百篇。端賴緝熙之益。談經既畢。第賞可稽。具官某。早冠時髦。寢爲朝望。踐揚已久。既昭著夫外庸。獻納于今。喜時陳夫諫論。謹鳳掖代言之職。當金華卒業之辰。序進文階。以酬儒效。其罄格心之學。用爲報上之忠。



# 攻媿集卷四十二

## 內制

擬進郊祀御札紹熙五年。〔案〕是年七月光宗禪位寧宗。未嘗郊祀。篇中有慶歷六年云云。蓋在光宗未禪位時豫擬。而事不果行。

朕祇膺慈訓。嗣守洪圖。仰天地之儲休。以綏四海。賴祖宗之垂裕。寢歷六年。欲涓長至之辰。載舉親郊之禮。膏澤可占于農扈。信盟久締于鄰歡。汔可小康。敢忘昭報。率由舊典。無事虛文。上萬壽于重親。式嚴孝治。均蕃釐于兆姓。匪鄉朕躬。按令甲以陳儀。體先庚而申命。朕以今年十一月祇事于南郊。播告中外之臣。咸謹駿奔之職。其飭爾事。毋愆于儀。故茲札示。想宜知悉。

### 擬立皇子嘉王皇太子制

朕祇若大猷。紹休列聖。念承統之重。允屬元良。惟主器之嚴。莫如長子。仰稽古制。詳考舊章。匪予一人之私。繫爾四海之望。誕揚明綽。敷告大廷。皇子具位某。夙稟謙恭。動循儀法。生長帝王之胄。周旋詩禮之經。迨予纘承。勉爾諭教。宏開藩邸。寵之茅土之封。妙選英賢。爲之羽翼之助。而能服勤講貫。尙論古先。閱義理以滋多。屏驕奢而不顧。朕惟儲貳。不可以曠位。國本宜先于正名。其從朱邸之尊。入處青宮之重。於戲。立嫡以長。所以綿宗社之休。爲下得人。所以係臣民之望。

擬進登極赦文續熙五年七月五日

朕共爲子職。日守宗藩。烈祖上賓。曾未釋服。鑒父違豫。幾不勝喪。屬上意之倦勤。屢思退託。蒙太皇之出令。違命纂承。眇茲冲人。膺此大器。驚惶失次。涕泣固辭。謂二百年社稷之傳。豈容執遞。惟億兆人謳歌之戴。久已屬心。仰有體于慈讓。俯難違于衆志。祇承丕祚。以撫萬方。自維寡昧之資。深思付託之重。祈天永命。用綿龜鼎之休。發政施仁。首播風雷之號。可大赦天下。云云於戲。奉三無以勞天下。敢懷以位爲樂之心。斂五福而錫庶民。壹布與物。惟新之澤。罔間遐邇之衆。咸瞻曠蕩之恩。

季秋淫雨震電罪己責躬詔續熙五年十月

朕臨御以來。三閱月矣。迺者。洚水爲災。幾旬尤甚。悉意賑撫。未知攸濟。而又陰氣爲沴。天作淫雨。繼之震電。信宿猶未已也。時維季秋。實已孟冬。茲豈其時耶。變不虛致。朕甚懼焉。豈朕之德薄。不足以承祖宗之休烈。抑眇躬有過。朝政或闕。而致然歟。雲漢之詩。遇災而懼。終篇惟及靡神不舉。靡愛斯牲等語。蓋言如此。而天降之災。罪必在我。側身修行之誠。見于言外。此朕之所當勉也。朕欲應天以實。而方執壽皇之喪。避殿撤樂。皆無以自見。惟是罪己責躬。其曷敢後。布告中外。使知朕恐懼修省之意。

孝宗祔廟德音續熙五年十二月

朕躬繩祖武。日懋孝思。萬邦之君。尤有貽孫之典。七月而葬。適當同軌之期。悵莫報于皇慈。惟謹襄于大事。卜夏禹巡狩之地。近高廟衣冠之藏。載謀載惟。既營神域。必誠必信。已窆靈輿。迓吉仗以言旋。肅太宮

而班祔。緝儀云備。舊制可稽。固已遵三年之通喪。體累朝之儉德。鑄除浮費。戒節虛文。然念遺誥初頒。郡下有奔號之擾。因山之際。國人多供億之勤。未免煩會稽之徒。宜特肆櫟陽之赦。神祇效順。咸議恩封。官吏宣勞。均行賞賚。寬井里之賦調。清囹圄之縲囚。庸推澤物之仁。用繼憂民之志。於戲。蒼梧不返。人心惟慕于重華。溫洛未歸。陵邑尙安于永阜。咨爾有衆。服予異恩。

改嘉定元年詔

朕嗣承大統。勤撫庶邦。更星紀之一周。見歷元之三易。頻年相繼。寰宇多虞。邊釁遽開。顧生靈之何罪。蟲蝗爲孽。與旱潦以相仍。皆權臣誤國之致斯。在非質應天之敢慢。今則典刑已正。綱紀益張。乃因正月之和。適際三陽之泰。誕揚大號。亶告多方。取商宗嘉靖之言。暨周王眷定之義。用光嗣歲。式迓休祥。庶幾叶氣之薰。太平可望。行見萬民之集。得所爲期。衍丕祚于無疆。與斯人而更始。其以明年爲嘉定元年。

戒飭貪吏詔

嘉定元年三月十四日。

朕臨御以來。仰遵累朝恭儉之規。菲食卑宮。靡敢怠遑。庶幾躬行以移風俗。而志勤道遠。觀感未孚。況以姦倖弄權。故相同惡。上下交利。賄賂公行。賊吏債帥。益無忌憚。監司爲吾澄按之官。郡守受吾民社之寄。至相倣效。貪婪無厭。反恃苞苴。狼籍已甚。席卷帑藏。或盈鉅萬。郡縣經費。耗盡幾盡。軍民衣食。惟剩無餘。積敝有年。雖悔何及。大臣簠簋不飭。殆弗容遷就而爲之諱也。朕方厲精庶政。與民更始。申加訓飭。以警有位。繼自今各務精白一心。以承至意。其有竝緣公家。以濟其私。尙爲故態。必罰無赦。至如互送無藝。屢

形切責。遐方循習。曾不少悛。並當禁戢。或徹聽聞。考驗有迹。皆以賊坐。嗚呼。咎莫追于既往。法欲勵于將來。宜存素絲之風。毋蹈覆車之轍。使人知自愛。罔或敢干。冀民力之少蘇。期士風之益嫩。朕意厚矣。尙其戒哉。

戒飭四川將士詔

嘉定元年四月九日

朕端居法宮。慨念蜀道。敢泄邇而忘遠。庶一視以同仁。自叛將之既誅。與斯人而更始。已講休兵之策。冀臻徹戍之期。惟是師徒。屢更征役。暴露久矣。夙宵惕焉。每咨督餉之臣。仍飭列屯之帥。究心調度。加意撫循。然而養兵于無事之時。在國家而靡吝。効命于多虞之日。乃吏士之當爲。儻饋運之或愆。及勤勞之弗恤。罔孚朕志。豈道官常。凡爾在行。亦宜深體。其有狃于姑息。不知律紀之遵。妄肆譴譁。幾失等威之辨。流傳易惑。關繫匪輕。爰頒一札。十行之書。用嚴三令五申之制。各思戒儆。毋抵憲章。

閔雨求言詔

嘉定元年閏四月二十六日

朕惟祖宗傳祚之重。祇懼靡遑。而自去歲以來。蝗蝻爲災。冬旣無雪。春又不雨。以至于今。陂澤揚塵。種未入土。夏且半矣。祈禱不應。間有靈霖。未能通濟。天災流行。固亦有之。在于今茲。關繫實重。邊鄙甫定。流徙未復。漕運不至。糴價日增。苟失歲事。何以保邦。朕于宮中齋心致禱。又將躬謁于靈神。且飭臣鄰。廣求民瘼。六官帥漕。各令條具。可以慰安人心。消弭天變者矣。載惟雲漢之詩。靡神不舉。靡愛斯牲。祈年孔夙。方社不莫。祈于天。以及父母先祖。不見責躬之言。蓋宣王謂周家祈禳之典。旣已備舉。旱而旣太甚。是必在

我有以得罪于天。其遇災而懼。側身修行之意。藹然見于言外。朕心慕焉。固知大軍之後。必有凶年。不敢以此自解也。傳不云乎。屋漏在上。知之在下。人苦不能自知。其播告中外。凡朕躬之不逮。朝政之缺失。與夫田里愁嘆之由。軍民疾苦之狀。盡言無隱。朕將採而用之。庶幾以實應天。冀消災沴。以迄康年。無小無大。惟既乃心。稱朕意焉。

右丞相錢象祖等以旱蝗星變待罪不允詔

朕臨御寢久。兢惕靡寧。更化以來。厲精深切。雖邊鄙有息肩之日。而民生當望歲之時。旱魃爲災。飛蝗肆孽。方陽光之煜晝。見太白之爭輝。豈天道之難知。實朕躬之自致。無所歸咎。惟知反身。尙虞抑塞之未伸。正欲交修于不逮。騰章來上。憂國良深。有何愆尤。而欲引去。退惟涼德。詎可下移于大臣。所冀同心。庶以靈承于上帝。尙安厥位。益遠乃猷。

趙彥逾再上劄子辭免端明殿學士并執政恩數不允詔

卿以起部大常伯。領袖從班。主耳忘身。預陪國論。金陵吾之北門。固以謀帥爲重。文明之峻職。政府之異數。所以寵卿之行。今欲辭二者而之。鎮。顧豈若留卿以自近乎。朕慮之甚審。久而後發。不應至此。乃復反汗。無以多言爲也。

新除安德崇信軍節度使伯圭辭免不允詔

朕肇禋重屋。懼弗克堪。贊予盛儀。賴我宗老。首頒祭澤。無加于達尊者。乃因舊鎮。益以漢東之大國。備三

公之典策兼兩鎮之節旄。先正以爲異數。非如卿者。其孰能當之。何用竊謙。以避斯寵。

新除少傅。周必大辭。免不允詔。

卿三朝元老。身佩安危。退處東山。直欲棄置人間事。顧豈以爵秩爲心哉。朕初臨御。注想不忘。下詔乞言。疏恩進律。亦可以見朕意矣。覃霈之頒。無遠弗屆。安有達尊如卿。而可但已。保傅一問。不必固辭。遜章甚力。非朕所望。

趙汝愚再辭。免提舉編修國朝會要。不允詔。

卿進專國秉。總領衆職。無所不統。固無待于兼官也。國家以史事爲重。故必擇其尤重者。屬之上相。疊界三組。旣已再命。而又欲辭其一。何耶。會要之書。故實所萃。諸儒載筆。坐聽宏摹。兼人之才。豈復憚此。其祇成渙。以訖奏篇。

吏部尙書鄭僑辭。免兼寶錄院修撰。不允詔。

高宗中興。臨御三紀。一代之史。簡冊拏繁。設官累年。汗青無日。朕旣命大臣爲之典領。思得鴻儒耆德。爲諸儒倡。卿自陪都還朝。表儀從班。論撰之重。非卿誰屬。矧惟舊物。不待疇咨。趣上奏篇。毋勞謙避。

吏部侍郎彭龜年辭。免兼侍讀。詔。

朕開邇英之閣。瞻無逸之圖。上慕唐虞。近法祖宗。正有賴于啓沃之助。卿以舊學之臣。勸講多益。升之進讀。亦惟序遷。朕方汲汲于學。卿欲濟濟相遜。固經帷之美事也。然雖有德齒之尊。不曰朝廷莫如爵乎。其



毋固辭。徒稽朕命。

王蘭再辭免知潭州不允不得再有陳請詔

惟有周之盛時。以分陝爲重任。故煩舊弼。往鎮邊陲。升祕殿之隆名。易昭潭之巨屏。輿言允協。憂顧滋寬。胡爲再辭。至勤三命。粵漢詔流行之既久。諒楚人後望之已深。倚聞叱馭之行。毋執循牆之避。

新除四川安撫制置使趙彥逾辭免不允詔

蜀道險遠。人所憚入。一之爲甚。其可再乎。然朝廷爲官擇人。不免于推轂以遣。忠臣忘身徇國。豈難于叱馭而行。昔趙抃以匹馬入蜀。爲政簡易。及其再命。神宗諭之曰。近歲無自政府復往者。卿能爲我行乎。抃曰。陛下有言。卽法也。願豈有例哉。今朕知卿清節著于蜀。遂用熙寧故事。卿能體抃之忠。其得辭行乎。

新知鄂州吳玘辭免不允詔

卿奮自戚閉。被服儒雅。雖齋壇授鉞。棘位通班。人終以用未盡其才爲言。矧襄漢上游。嘗饜善最。武昌重地。宜分顧憂。何必固辭。亟其祇命。

趙彥逾再辭免新除端明殿學士中大夫四川安撫制置使兼知成都府不允不得再有陳請詔

蜀道天下之絕險也。然以爲難則難于上青天。以爲易則易于履平地。是在人爾。卿嘗總軍餉。調度五十餘州。公廉明恕。蜀人誦之。茲庸命以制閩之寄。蜀父老聞卿之來。必有不待教而孚者。矧視儀政地位。望愈隆。尤足以示朕不忘遠之意。謀帥之重。蓋無以易卿者矣。

趙汝悉辭免大禮加食邑實封不允詔

朕祇事總章。懼弗克堪。卿以端揆。實專使領。天地並貺。神明顧歆。熙事備成。顯相之力也。賦以多邑。具有故實。既免告廷之禮。何事循牆之避。

新除刑部侍郎梁總辭免不允詔

卿少習憲章。歷觀棘寺。爲郎爲卿。皆以此選。正以明練吏事。心計有餘。遂持使節。遂董軍餉。擢貳民曹。俱號稱職。若今秋官虛員。舍卿尙誰屬耶。明允篤誠。若自道然。萬里使還。徑俾爲真。僉曰汝諧。何辭之有。

吳琚再辭免不允不得再有陳請詔

朕立賢無方。惟才是用。亦不必曰右賢而左戚也。爾嘗主漕計。總軍餉。出帥襄陽。皆有治狀可紀。而強仕之餘。使之奉祠燕處。可乎。鄂渚兵民雜居。號稱難治。正倚才刃。勿復謙辭。

王蘭辭免覃恩轉一官不允詔

朕嗣位云初。覃霈四方。小大之臣。罔不均被。卿以元樞舊德。出鎮雄藩。序進一階。亦惟彝典。忽披遜牘。殊拂眷懷。其服恩光。毋留朕命。

周必大再辭免少傅不允不得再有陳請詔

朕勉紹丕圖。方修初政。首推霈澤。溥及羣工。惟予元老之賢。宜陟孤卿之秩。偃息而藩魏室。何必在廷。寅亮而命周官。是爲進律。載披來奏。殊拂眷懷。卑于公尊于卿。亦惟均耳。一而俯。再而偃。何以多爲。茲繫具

瞻毋庸固避。

梁總辭免奉使回程時轉一官不允詔

卿輟自從班遠使鄰國服勞已甚成禮而還序進文階厥有舊典往祇渙命何事謙辭

知明州何澹辭免曾任藩邸講官轉一官不允詔

卿頃以儒英授經于朕逮予嗣服眷注不忘求之近比當進兩秩舊僚遜避俯徇其請在卿又何辭焉宜遂欽承毋至于再

知秦州韓同卿辭免改授正任觀察使在京宮觀不允詔

朕勉承丕祚肇正中宮爾爲后父之親召自淮壖之守眷惟相種本出儒門屬王姬下嫁之恩致武爵流傳之衆茲優咸開超授廉車俾仍奉于內祠蓋一遵于故典是爲允愜其又奚辭

賜觀文殿學士致仕李彥穎銀合茶藥詔

朕祇紹丕圖緬懷故老卿前朝舊弼佑我烈祖遺榮告歸世推典型比進嘉言尤見忠藎一水間之日勞注想爰頒飲劑以實寶匱問勞有加將予至意

賜龍圖閣學士致仕程大昌張大經敷文閣直學士致仕汪大猷顯謨閣待制致仕程叔達寶文閣待制致仕沈樞敷文閣待制致仕李昌圖銀合茶藥詔

朕寤寐賢俊懷思老成卿頃侍孝宗夙著聲望引經告老張大經改垂車告老世推典型逮予纂承渴于一見爰加

問勞。仍有匪頒。體予至懷。無忘忠告。

資政殿大學士黃洽辭免覃恩轉一官不允詔

朕踐阼云初。訪予落止。緬懷舊弼。嘗下求言之詔矣。乃因覃霈。俾進文階。國有彝章。非有私于卿也。其服訓詞。毋煩多避。

周必大再辭免少傅不允不得再有陳請詔

朕嗣膺洪祚。注想宗工。比升孤棘之班。實霈蓼蕭之澤。雖云恩厚。非曰予私。凡卿之言。近已行于一二。顧朕所與。辭何至于再三。若夫地爵之科。尤匪尊賢之意。尙承眷渥。毋事勞謙。

殿前都指揮使郭杲辭免修蓋大內福寧殿等特轉一官減三年磨勘回授不允詔

朕俯徇羣臣之請。歸安廣內之居。顧棟宇之崇成。命工徒之勞止。卿親臨鑿鼓。祇事殿巖。訖役云初。懋官可後。既有地恩之命。毋煩避寵之詞。

知樞密院事陳騏乞歸休不允詔

卿儒學老成。有大臣體。肆朕纂服。方厚倚毗。何爲露章。遽祈閒退。謀猷克壯。神明未衰。其謹輔予。無事力請。

新除知樞密院事余端禮辭免不允詔

朕惟宥廷之任。事體至嚴。非長材不可以濟時。非壯猶不可以經遠。卿兼資文武。久贊樞機。輔政以來。輸

忠無隱。輟自中臺之貳。進專西府之權。蔽自朕心。益隆兵本。是爲妙選。非以敘遷。公論具孚。遜章可略。新除參知政事京鏗辭免不允詔

卿以通敏宏達之才。受知烈祖。擢之法從。付以全蜀。太上召還文昌。有意大用。肆朕纂服。登貳西樞。關決籌帷。動稱朕意。是用進參機政。以究經濟之蘊。鎮浮應變。卿所優爲。眷倚方深。毋庸多遜。

新除同知樞密院事鄭僑辭免不允詔

卿久儀禁路。人望最高。垂上政途。詳試帥閫。天官之長。至勤三人。西樞爲貳。蓋已晚矣。朕訪落求助。二三大臣是託。以卿宏才素蘊。練達國體。急于登用。以冀治功。其祇成命。以圖回本兵之務。勿以謙避爲煩也。

正議大夫陳騭辭免除職與郡不允詔

朕惟釋政機而均逸者。大臣全進退之宜。昇華職以示寵者。累朝篤始終之眷。矧惟耆哲。朕所倚毗。專西樞本兵之權。兼東府基命之地。俯徇忱請。暫分外藩。恩禮加優。典章可攷。少須除命。何用謙辭。

王蘭再辭免覃恩轉一官不允不得再有陳請詔

朕勉承基緒。猶懼弗堪。實賴臣鄰。相與協濟。不有近輔。孰爲之贊襄。不有介藩。孰爲之屏翰。需恩所逮。中外惟均。矧如舊弼之賢。方倚上游之重。需章洊至。渙號難回。其遂欽承。毋爲固避。

御史中丞謝深甫辭免兼侍讀不允詔

進讀露門。自昔高選。肆朕纂承之始。首務詳延。妙擇法從之賢。不以輕畀。以卿器資端亮。學問淹該。議論

正平實長風憲。俾侍經幄。士莫之先。胡爲引辭。尙留朕命。令行弗反。倚聽嘉猷。

新除資政殿大學士陳騫辭免不允詔

卿器資剛毅。經術該通。久任事樞。臨機輒斷。力祈閒退。善始以終。況辭藩屏之除。願處祠庭之佚。由衷有請。反汗無嫌。若規殿之隆名。乃大臣之彝典。再披遜牘。殊拂眷懷。用榮買臣衣錦之歸。毋作考父循牆之避。

# 攻媿集卷四十三

## 內制

新除戶部侍郎袁說友辭免不允詔

版曹天下之劇任也。而卿爲之之時尤難。向來國家多故事緒浩穢。經費之外。又增不時之須。屬歲大祲。調度不給。卿儒學俊茂。舊歷清華。通敏有餘。獨任大計。內之無闕供之急。外之無誅求之怨。滿歲有奇勞。亦甚矣。爲真已晚。又何辭焉。

新除少師永寧郡王郭師禹辭免不允詔

阜陵之役。重事也。朕不得躬執紼之勞。祖遣有行。號慕弗已。卿以王之元舅。國之信臣。辦護宜勤。爲朕任送終之責。往來順濟。上下無譁。禮備安虞。歸祔太室。卿得以報孝宗之恩。朕可忘所以賜卿者哉。進長孤棘。仍加王爵。旣渙告廷之命。何煩避寵之詞。亟其欽承。朕言不再。

伯圭辭免兼中書令不允詔

中書造命之地。令公師長百僚。清貴華重。古人謂之鳳凰池者也。國朝之制。率以寵異親賢。然祥符天禧以還。久不除此官矣。惟公明德懿親。貴重無二。三公兩鎮。何以加此。爰舉曠典。以資宗正。旣無兼管內樞。

之煩。復得老成典刑之重。渙汗大號。毋庸固辭。執謙雖勤。禮難曲徇。

太府卿吳琯辭免換授正任觀察使在京宮觀不允詔

卿生長戚閤。儒雅自將。佳公子也。名曹繕監。踐斂有年。總饒殊方。寢升卿列。賢勞既久。寵以賜環。廉車內祠。用循故事。非以爲褒美也。春秋方富而才可用。豈遂投閒哉。毋事牢辭。其祇朕意。

新除觀察使謝淵辭免不允詔

卿以祖后至親。往爲使介。風埃萬里。不憚馳驅。成禮而還。褒升可後。廉車之峻。遂登從班。毋庸空辭。思所以稱此則善矣。

知紹興府葉蠹辭免除龍圖閣學士不允詔

孝宗因山之役。凜然懼不克奉大事。文昌老成。尹茲東郊。遂委己以聽焉。神明不衰。心計有餘。酬酢萬變。調度百出。卒之禮成而無缺典。用足而節橫費。朕心嘉之。絕江不風。入山而雪。謂非卿之力耶。進職龍圖。姑以示寵。朕之所以待卿者非止此也。而又何辭焉。

知樞密院事余端禮辭免攝太傅持節導孝宗靈駕及奠諡冊諡寶監掩欂宮轉一官不允詔

比者營圖東越。襄奉阜陵。卿以本兵之崇。親臨復土之重。往來俱順。上下無譁。塗潦方深。蹇蹇盡王臣之節。顏色尤戚。欒欒有棘人之風。朕方篤孝思。幸周大事。既賴送終之助。首加進律之褒。是所宜然。無可辭者。



郭師禹辭免備禮冊命宜允詔

卿以祗奉阜陵。顯頒制綽。升孤卿之峻秩。封異姓之眞王。冊命之儀。朝廷當備。控辭甚力。引義尤高。雖俯徇于謙沖。顧豈忘于嘉歎。

趙汝愚辭免不允詔

卿輔朕初政。備宣忠力。茲奉孝宗大事。厥功茂焉。褒崇之典。所宜優異。正以卿素執謙沖。避遠權勢。凡有進擢。辭遜過禮。或至迫而後受。故尤思所以處卿者。初拜右揆。已授此官。還以昇卿。是不爲過。毋復牢辭。朕必不爲反汗也。

宣州觀察使孫璫辭免孝宗隨龍特轉一官不允詔

列祖上賓。孝思日切。仰威靈之如在。率禮不違。念攀附之幾人。獨汝無怠。爰自廉車之秩。特升留務之班。其服異恩。寧容反汗。

參知政事京鏗辭免孝宗祔廟畢特轉一官不允詔

朕尊奉皇祖。無所不致其厚。而送終之禮。祔廟尤嚴。卿以輔臣。相此盛儀。已事而竣。可後褒賞。進以一秩。誠不爲過。賞有先後。旣已均及。卿可獨辭乎。

皇伯祖伯圭辭免贊拜不名加食邑實封不允詔

天下有達尊三爵。一德一齒一而未及言親也。惟公德明。爵齒俱尊。而又孝宗同氣之親。太上皇之伯父。

而朕之大父行也。貴窮人爵。思所以尊異之。非舉曠典。不足以稱。紫微令公既以謙辭而不受。朕其可遂已乎。不名之禮。蓋自尙父。保衡以來。實朝廷之殊禮。前朝嘗以寵待親賢。百有餘年。無有可當此者。舉以命卿。人無異辭。尙形遜避。朕不敢從。邦之榮懷。亦非朕敢私也。

知樞密院事余端禮辭免兼參知政事不允詔

朕圖回治功。方倚二三大臣以爲重。卿頃自參預。進長樞廷。宰席偶虛。俾兼政地。茲惟故典。亦今之宜。非卿通才。何以任此。亟其承命。無事謙辭。

新除觀文殿大學士知福州趙汝愚辭免不允詔

卿以肺腑之戚。爲社稷之臣。翊戴眇躬。輔相初政。力足以任天下之重。識足以斷衆志之疑。倚毗方隆。引去何速。雖有議者。亦無異詞。遂釋台符。往分帥閫。極祕殿之殊寵。實累朝之舊章。事君以忠。卿既全出處之致。退人以禮。朕當篤始終之恩。尙冀告猶。毋庸辭命。

余端禮辭免權提舉編修玉牒監修國史日歷不允詔

朕惟國家以史事爲重。典領之任。必命大臣。寶牒之設。蓋古者書之于策之遺意。日歷則以事繫日。後之信史。實基于此。卿問學通博。攝行相事。非卿其誰宜司之。成命已行。毋容多遜。

參知政事京鏜辭免權提舉實錄院編修國朝會要不允詔

高皇帝中興之烈。當遂特書。累朝庶政之規。尤宜分類。故實錄則取史遷之舊。而會要亦用唐室之餘。爰

命大臣。職此二者。卿素推該洽。俾視纂修。其躬率諸儒。以趣成大典。茲爲故事。何必謙辭。

寶文閣學士知遂寧府宇文价乞奉祠不允詔

卿以文昌舊德。往鎮蜀藩。居外數年。所在稱治。方此政成于大府。正資臥護于遠民。忽騰諗疾之章。欲遂奉祠之請。眷倚之重。神明未衰。其訖外庸。毋違朕志。

提舉臨安府洞霄宮趙汝愚辭免觀文殿大學士不允詔

大臣進退之宜。固知有義。人主始終之遇。尤當示恩。矧惟宗工。祈解機政。念忠勞之素著。曾倚注之未衰。歛然賦歸。若此勇決。閩山舊鎮。旣避寵之甚堅。書殿隆名。豈升華之可已。諒還寓里。暫佚真祠。其體眷懷。毋爲多遜。

少保周必大再乞致仕依已降指揮不允詔

七十致仕。雖著于禮經。二三大臣。難拘于古制。矧惟元老。嘗冠中台。周旋兩朝。負荷重事。旣干蕃于南國。終退處于東山。神明未衰。德望彌劬。奉真祠之香火。自樂隱居。挂神武之衣冠。胡爲早計。抗章再至。陳義愈高。顧難徇夫沖懷。尙少安于素履。

寶文閣學士知太平州李燾乞宮觀不允詔

卿老于文學。久處禁林。出守當塗。日徯報政。明爲諗疾。欲遂求閒。朕方念典刑之舊。望屏翰之良。卿豈不能體此眷懷。爲斯民而少留乎。

余端禮辭免右丞相不允詔

朕承付託之重。思紹祖宗之大業。志勤道遠。悠哉未艾。置相之際。其何敢輕。寧槐位之暫虛。必疇咨而後授。卿純明篤厚。秉德不回。入從出藩。望實兼著。本兵貳政。三載于茲。論事有諍。臣之風。謀國得宰相之體。具瞻攸屬。顯拜不疑。惟今亦多故矣。朕欲賴卿以濟。書所謂若濟巨川。用汝作舟楫。卿其以此自任。副朕倚毗。萬斛之載。惟卿爲宜。而又何辭焉。

新除知樞密院事京鏗辭免不允詔

朕惟聖人不畏多難。而畏無難。于今雖曰邊鄙不聳。而宥密之司。正當爲不虞之備。無競維人。朕于是注意焉。卿以慷慨宏遠之資。有志事功。立節于殊鄰。宣威于全蜀。纂紹之始。一見而決。擢貳樞筦。風采凜然。預政未幾。復爲之長。迹若序進。實繇德選。當仁無遜。其又何辭。

新除參知政事鄭僑辭免不允詔

朕以寡昧。嗣無疆大歷服。惟二三大臣是賴。凡今日德望在人。爲國家用。皆兩朝選擢。留以遺朕者也。卿周旋從班。雅有公輔之器。登之樞筦。人以爲晚。顧豈以日月爲功乎。參預政途。僉言爲允。宜遂佐朕。宏濟多艱。引避抗章。非朕所望。

新除端明殿學士簽書樞密院事謝深甫辭免不允詔

卿始以縣大夫奏事孝宗。一見以爲有唐人風。親擢再三。如恐不及。上皇用卿于諫省。試卿于天府。而登

之從班肆朕纂承輟秣陵之行而實風憲之長進讀金華引以自近用卿之意久矣寵加書殿升貳幾廷卿豈未知朕意耶何避寵之力也亟其祗命毋用費辭

新除權兵部尙書張叔椿辭免不允詔

卿出入朝列敷歷最深凡今要途多出卿後文昌八座乃爾世官端粹亮直之資視名父以無愧臺綱諫省久矣賢勞進長夏官朕命惟允往其率職何事謙辭

權兵部尙書張叔椿辭免兼侍讀不允詔

惟卿先正以經術侍孝宗于潛藩逮居文昌實兼露門卿立朝不阿雅有父風聽履之初仍命進讀此措紳美談也何辭之有

右丞相余端禮辭免權提舉編修玉牒實錄院編修國朝會要不允詔

史冊之成欲傳千萬世國家所重莫盛于三書大事則續爲鏤玉之編中興則未就汗青之簡况舉綱而撮要欲踵事以增華宜有宗工併修鉅典卿嘗兼二者未浹四旬既進秉夫鈞衡俾盡專于筆削宅百揆而熙帝載惟爾之休總衆職而稱上心非卿孰可

參知政事鄭僑辭免權監修國史日歷不允詔

朕惟史事至重功用浩博惟以事繁日謹而書之則後之信史于此乎取分命諸儒而領以大臣國家之令典也卿以儒英出入冊府有年矣茲參大政命總宏謨良史之才加以學識公議所屬尙何辭焉

戶部侍郎袁說友辭免兼侍講不允詔

卿性資閎敏。儒術該通。雖當主計之繁。每切愛君之念。方御圖云始。首闢經帷。而建議獨先。能發朕意。前所陳請。旋已施行。近因獻納之餘。復上課程之奏。深嘉忠藎。俾與講明。性謙論之是求。何需章之爲遜。亟就邇英之列。以裨典學之勤。

新除吏部侍郎林大中辭免不允詔

卿天資夔挺。論事不回。比以久居臺端。慈皇蓋嘗命以小宰之職矣。去爲劇郡。召歸近班。旣殫批勅之勤。庸昇典銓之任。踐敷惟舊。選用匪輕。清吾文部。以助官人之能。不亦休哉。避寵丐閒。非朕所望。

新除吏部侍郎兼太子左庶子婁機辭免不允詔

天官貳卿之司。有資銓綜。春宮中護之職。尤遴選掄。卿性稟深淳。才猷挺特。以天下士。從吾兒遊。頃尋里社之閒。久樂祠庭之適。茲方更化。首遂建儲。思得老成之人。以重元良之輔。亟頒召節。重上從班。毋庸固辭。式副虛佇。

新除開府儀同三司充萬壽觀使楊次山辭免不允詔

朕維新庶政。豫建儲闈。屬時戚閑之賢。久安均逸。進視鼎司之貴。豈曰示私。卿素迪忠勤。居懷靜退。謹容儀而就列。尤爲耆艾之英。養威重以闔門。尤服滿盈之戒。逮茲播告。曾靡異辭。覽巽牘之亟陳。願謙懷之難徇。其祗成命。毋拂予衷。

新除權兵部尙書兼侍讀倪忠辭免不允詔

朕惟姦臣竊權。上下蒙蔽。導諛獻佞。習以成風。卿至朕前。獨效忠讜。誼氣足以激頽俗。英詞足以發壯懷。鳳鳴朝陽。何足以喻。迨茲更化。可後趣歸。來對使朝。言議益偉。武部之長。露門之讀。姑引卿以自近耳。往其承命。毋執牢辭。

新除禮部侍郎兼侍講章良能辭免不允詔

卿夙富青箱之學。來居紫橐之班。兼直北門。典司東觀。朕惟親軍旅之務。非以待詞翰之臣。儀曹旣俾爲真。經幃仍資勸講。爰總夷夔之任。實親楮馬之賢。僉謂汝諧。卿毋多遜。

右武大夫文州刺史知閣門事楊谷辭免除觀察使不允詔

爵惟馭貴。當昭示于至公。恩以及親。遂優加于彝典。卿起由戚畹。列在朝紳。入儀賓閣之司。歸服家庭之訓。克存孝謹。不見驕盈。爰稽閱歲之勞。超進觀風之秩。需章來上。幾不自勝。渙汗旣頒。固難曲徇。其益堅夫素履。庶長保于令猷。

右武郎知閣門事楊石辭免除觀察使不允詔

名器至嚴。豈容于輕授。恩榮加厚。遂越于常規。卿毓秀后家。通班朝路。素有義方之訓。密參賓贊之司。居存忠勤。深避權勢。爰攷踐敷之舊。躡升廉問之華。成命旣行。固難反汗。遜辭來訟。尤見益恭。其體至懷。以永終譽。

兵部尙書倪思辭免兼修國史兼實錄院修撰不允詔

國之大典。尤貴于擇人。史之良才。當先于求舊。卿蚤嘗再入。素擅三長。孝宗擢之著作之庭。先帝處以獻納之任。皆參筆削。具在簡編。茲當更化之初。方以得賢爲喜。式資班馬之體。追配商周之書。允謂汝諧。尙何多遜。

禮部侍郎章良能辭免改兼修玉牒官不允詔

古者大事書之于策。玉牒之所由起也。唐始建官。而未若本朝之重。寫之精縑。皮之遼殿。他書莫嚴焉。以卿比司記注。久居史館。是用任以大事之重。凡例昭然。具有書法。翦繁撮要。作宋一經。以詔來世。方以此望卿。而又何辭。

吏部侍郎婁機辭免兼太子詹事不允詔

召還紫橐。固有賴于吏銓。肇建青宮。尤選求于端尹。卿性姿凝遠。問學老成。久爲資善之寮。實謂甘泉之舊。雍容引去。恬然自如。屬茲更化之初。矧復建儲之重。載煩哲艾。以輔元良。毋庸固辭。服我休命。



# 攻媿集卷四十四

## 內制

端明殿學士四川宣撫副使安丙乞宮觀不允詔

卿沈毅善謀。尤長將略。內鉏巨姦。外禦強敵。履天下之至難。爲全蜀之司命。虜實畏卿。如所謂祭北門祭西門者然。彼之技亦窮矣。乃瞻西顧。嘉歎不忘。方升書殿之班。以重闔外之寄。胡爲引疾。願解印章。朕方賴卿以當一面。賢于長城遠矣。卿其身任保障之責。以稱朕意。

京西湖北路宣撫使宇文紹節辭免除寶謨閣學士不允詔

入陪經幄。外暢王靈。旣物望之愈隆。豈褒章之可後。卿受才挺特。抗志崇深。不惟誓報于國恩。尤欲仰追于祖烈。宣威邊徼。遂寬北顧之憂。寓直文譏。益峻西清之職。尙殫忠藎。嗣有寵嘉。毋事牢辭。亟祗新渥。

新除寶謨閣直學士李寅仲辭免召赴行在不允詔

朕志于有爲。心不忘遠。矧惟簪橐之舊。具宜藩翰之勞。旣頒優恩。仍趣歸覲。卿素全忠孝。備著事功。豈惟勁草之知實。障狂瀾之倒。峻西清之職。未稱眷懷。望東海之來。方深渴想。尙騰遜牘。未就鋒車。式遣其驅。勿重有請。

禮部侍郎章良能乞宮觀不允詔

卿以該洽通敏之才。洊直齋禁。亦既三載。身兼數器。宜勞翰墨之間。夥矣。朕更化之初。大述作多出卿手。方有賴于論思之助。遽欲以目眇求退。非所樂聞也。卿雖欲奉身而去。使朕幾似于棄才者。可乎。其安厥位。勿重有請。

新除觀文殿學士趙彥逾再辭免不允不得再有陳請詔

朕更化之始。登用賢才。宗老典刑。無如卿者。閔勞以官職之事。雍容進讀。以冀日新之益。進班延恩。少示眷意。一辭贅矣。況于再乎。身其康強。謀猶克壯。少親醫藥。毋復重陳。勉爲朕留。以繫人望。

侍讀趙彥逾倪思宇文紹節侍講章良能辭免進講毛詩終篇轉一官不允詔

朕日御邇英。講明經理。三百五詩。至是終篇。敘進官聯。厥有故典。卿爲宗老。倪思章良能云。卿居從列。宇文紹節云。卿雖處闔外。實助緝熙。毋事固辭。益思所以輔朕之不逮。

新除刑部侍郎曾喚辭免不允詔

朕更新治化。欽恤刑章。遴選貳卿。久令攝事。以卿性資直諒。器度寬洪。承東魯之儒風。襲南豐之家學。比安閒外。促使來歸。入對便朝。喜聞正論。刑惟弼教。方有望于老成。德本好生。當務先于明恕。亟祇隆委。勿事牢辭。

吏部侍郎梁季秘乞宮觀不允詔

惟卿先正受知高皇。既登聽履之班。尤多活國之計。是宜有子。爲予從臣。比更民曹浩穰之司。又歷銓部。公方之選。胡爲引疾。乃欲求閒。尙安厥官。以副眷倚之意。

刑部侍郎曾喚辭免兼同修國史兼實錄院同修撰不允詔

昔在先世。嘗繼列于史官。爾爲近臣。亦游司于直筆。閒居自適。更化惟新。召還獻納之聯。兼昇纂修之舊。豈特助成于國典。抑將大振于家聲。明命旣頒。遜辭可略。

福州觀察使鎮江府駐劄御前諸軍都統制兼知揚州畢再遇乞奉祠不允詔

牧守之良。方圖久任。將帥之重。尤戒迭更。惟卿沈鷺之資。拳勇自奮。身經數載。最多汗馬之勞。賞不踰時。亟上廉車之峻。領京口戎旂之寄。鎮淮堧制閩之雄。深明保障之圖。日講留屯之策。流民寢復。信使始通。甫臻按堵之期。遽上奉祠之請。其安爾位。以訖外庸。

皇太子某辭免每遇視事令侍立宰執赴資善堂會議不允詔

嘉定元年閏四月。

朕惟古者立國。必建儲闈。共爲子職。實資主器之重。惟予元子。篤意問學。年未及冠。綽如成人。朕欲俾爾習知國家之務。侍立吾左。預聞政事。師賓會議。皆吾大臣。朕方一新治體。兼聽公言。爾當周旋其間。日增聞見。以成溫文之德。尙其勉旃。毋事多遜。

四川宣撫副使安丙再辭免資政殿學士不允不得再有陳請詔

朕更化以來。愛惜名器。未嘗輕以假人。其有度越拘擥。超資級而授者。非如卿之雋功茂績。不予也。書殿

升華。以所以待執政者待卿。其內撫兵民。外飭邊備。使全蜀之境。奠枕無虞。以稱朕委任之意。以保爾功名之成。可矣。服我休命。毋爲固辭。

皇伯嗣秀王師揆生日詔

嘉定元年五月十五日

薰風南來。當朱明之方半。望舒東出。慶伯父之始生。是曰宗英。宜膺天壽。匪頌惟舊。寵數益新。

新除吏部侍郎章良能辭免不允詔

卿以剛勁之資。濟以博洽之學。爲吾詞臣。仍兼數器。其在儀曹。事有不可者。堅執不移。朕所歎嘉。進貳天官。其以處儀曹者處之。柅吏姦。明銓法。庶使無賢愚同滯之嗟。何爲固辭。更欲求去。非所望也。

新除侍衛步軍副都指揮使夏震辭免不允詔

卿赤心體國。忠勇自將。久攝殿巖。尤見勞效。步旅謀帥。卿實宜之。其爲吾協和三軍。訓之以義。密衛行闕。以折遐衝。胡爲固辭。其服休命。

開府儀同三司楊次山生日詔

嘉定元年六月二十三日

卿志樂燕閒。躬持廉靖。時當初度。宜介多祥。是爲戚閑之華。爰厚上方之錫。

知閣門事楊谷乞祠不允詔

卿戚畹之良。周行素謹。職司賓閣。寵昇廉車。忽求祠館之閒。欲待家庭之佚。且弟兄並列于朝著。以何嫌。倘父子退休。在眷私而有款。惟益崇于謙靖。亦奚慮于滿盈。其服厥官。毋庸有請。

寶謨閣學士前四川安撫制置使楊輔乞宮觀不允詔

朕以國家多難。更化善治。收用耆者。如恐不及。慨念舊學。存者幾人。就傅之初。卿爲首選。蓋吾烈祖之所親擢。向者持橐未久。翩然西歸。朕念此弗忘也。非不知制閫之重。有賴壯猶。而圖任之意。則有所在。召節旣往。注想待卿。控辭愈切。殊用憮然。載覽封章。宣示邇列。備見愛君憂國之志。益知尊主庇民之學。然與其獻言于萬里。孰若造膝而陳前。乃欲引疾求閒。效蜀莊之沈冥。何耶。矧西蜀之士。卿爲標表。肯爲朕行。則後生英俊。將于于而來矣。三命益勤。朕志不易。勿復有請。式遣爾驅。

京西湖南北路宣撫使宇文紹節乞祠不允詔

卿以通敏之才。淵博之學。起趨勳名之會。欲報家國之仇。輟從經帷。出撫邊徼。修好伊始。息肩可期。有如賢勞。盍還舊著。屬以繕修備禦之未畢。勞來安集之方勤。將圖爾功。少俟其定。忽上真祠之請。欲爲便道之歸。在卿則固所願焉。于朕則豈所望者。其摠長算。毋有遐心。

右丞相錢象祖乞解罷機政不允詔

方國家多事之時。任廟堂一相之職。卿蓋屢形于固避。朕亦自知其甚難。然而朕以更化云初。尤冀和平之福。而卿受恩最厚。素爲忠孝之家。正使慮有未周。力有弗及。猶需同心協志。求以尊主庇民。而況察卿之才。爲衆所服。寵以告廷之拜。豈日歷階而升。幸邊瑣之粗寧。恐事機之難測。中外未能小息。臣主靡容自安。早魃旣驅。星文未格。日不暇給。他何可言。偶微爽于節宣。宜倍加于攝養。勿念去計。共圖治功。宵旰

實勤。曷嘗以位爲樂。變調有賴。安得奉身而歸。

新除御史中丞章良能辭免不允詔

朕惟振朝廷之紀綱。當先重紀綱之地。新天下之耳目。必遴求耳目之官。卿鯁亮之資。淵深之學。自奮于韋布之日。有聞于搢紳之儒。雖遍歷于清華。亦屢更于夷險。處身無玷。疾惡如風。欲堅塞于倖門。曾不辭于怨府。彈擊之任。簡求實宜。其力辨于官邪。以共扶于國論。發卿所蘊。助朕有爲。勿騰避寵之章。益勵敢言之氣。

衛涇乞解罷機政不允不得再有陳請詔

居九五之正位。方以遇災而憂。何二三大臣。皆欲引身而去。豈朕所望于卿。奚安。尙賴同寅而協恭。庶幾轉禍而爲福。要須持久。或可圖功。雖屢請以難從。毋再辭而爲贅。

錢象祖乞歸田里不允不得再有陳請詔

朕慨踐阼之既久。念治效之不進。不惟不進。殆將阽危。是以惕然改圖。勵精更化。庶幾更也。人皆仰之之意。首論一相。得卿之賢。旁招俊乂。如恐不及。前此寒心數月。方幸交鄰少定。可以盡力內治。自卿及執政。以至論思之臣。造膝而言。無不傾聽。君臣之間。了無疑阻。卿等以災異請去。朕方側身自儆。不容重陳。而數日以來。廟堂五臣。而三求退。留行之詔屢下。請猶未已。不惟朕失所望。四方傳聞。其謂朕何。卿以勤勞致愆。調攝。惟益謹藥餌。以速痊愈。所謂故國者。有世臣之謂也。非卿而誰。其體一心。勿致三瀆。

褒語。卿相予未久。備罄忠勞。方圖內修。正藉協贊。知卿小疾。予告甚優。佇聞有瘳。勿復言去。

刑部侍郎曾喚乞祠不允詔

朕延登耆雋。列在邇聯。豈惟資讞議之平。真有賴論思之益。卿夙高譽處。久樂燕閒。粵從一節之趨。增重貳卿之選。惟明克允。方持憲以盡公。非道不陳。曾閱時之未久。忽披來診。遽欲告歸。有嘉易退之風。殊匪趣還之意。刑章方簡。議無待于過三。史筆至嚴。職何妨于共二。少安定著。難徇謙辭。

禮部尙書倪思乞祠不允詔

朕召收舊人。以圖新政。比者凡有一事。宰輔相與謀于廟堂。侍從相與議于臺省。粗無過舉。朕心以憚。今茲未能略定。而求去者紛然。從班亦有一二矣。矧卿素爲敢言。自陳讜論。不畏強禦。不避怨仇。歷歷爲朕陳之。擢長儀曹。以示褒表。亦爲此舉。何耶。朕求其故。豈朕有以致此耶。相應以文。止見辭費。惟當一切不聽。庶幾以一天下之觀瞻。其體眷懷。勿復有請。

簽書樞密院事林大中乞仍舊休致不允詔

朕更化之初。未遑他務。求賢甚急。首召耆英。起自挂冠之餘。擢居持橐之長。延登樞筭。增重朝廷。言必出于內心。謀實稽于古訓。倚毗方切。而疾遽侵。沖養有來。何恙不已。胡爲騰奏。卽欲告歸。尙精醫藥之調。以繫搢紳之望。

江淮制置大使丘密乞致仕不允詔

朕惟屯禁兵百萬而邊鄙是虞。開幕府四三而留都尤急。畀以樞廷之寄。增吾天塹之雄。卿久安里閭。游分帥闔。徒得君重。肯爲朕行。上寬宵旰之憂。外撫貔貅之衆。盡護諸將。獨當北門。草木亦知其威名。狄鞮想開乎風采。力裨廟論。卒靖封陲。人皆望歸袞之期。卿乃有掛冠之請。矧方叔之謀猷克壯。而晉公之神明不衰。益堅體國之心。毋作明農之計。

寶謨閣直學士李寅仲乞祠不允詔

朕緬懷巴蜀之民。未嘗忘遠。夢想淵雲之彥。尤務招來。卿蚤冠倫魁。久騰英譽。游登朝蹟。嘗爲獻納之臣。出殿侯邦。尤著蕃宣之績。特立搶攘之際。實增嘉歎之深。升學士之班。旣以旌其風節。趣鋒車之召。誠有望于謀謨。何辭之煩。以疾來諗。萬里云遠。當已戒途。三命滋恭。諒無俟駕。

右丞相錢象祖辭免提舉國史院實錄院提舉編修國朝會要不允詔

纂修史冊。深賴于公平。會稽典章。尤先于鴻博。允資碩輔。坐總宏摹。卿識洞古今。學該流略。接詞華于奕葉。用則有餘。攷故實于累朝。蓋其素習。舉以並命。了無異辭。毋遜牘之重陳。期奏篇之俱上。

參知政事雷孝友辭免權監修國史日歷不允詔

密贊政塗。日預萬機之決。參提史筆。正資數器之兼。卿早冠詞場。寢登冊府。迨通班于侍從。已嘗賴于纂修。朕慨大典之未成。選鴻儒而坐領。趣就累朝之策。仍嚴繫日之書。故事當然。謙辭可略。

刑部侍郎曾喚辭免兼太子詹事不允詔



朕遴選從臣。方賴論思之益。精求儲策。尤資輔導之功。卿累葉儒風。半生朝蹟。何止衣冠之偉。實爲簪橐之英。擢處宮端。允符公論。亟承明命。毋庸固辭。

觀文殿學士侍讀趙彥逾乞歸田里不允詔

朕更化之始。起大老于東海之濱。明德懿親。老成典刑。趣行造朝。國勢增重。訏謨遠慮。見于進讀。圖任共政。束于定制。偃息藩魏。人望所歸。小疾旣痊。正宜休養。大臣不可以暑行。其爲朕留。庶幾猶得奉露門之從容也。

吏部侍郎梁季琚乞待次州郡不允詔

朕惟論思之臣。欲全進退之義。若其未可以去。則亦難以遽從。卿爲國宣勞。旣云累歲。任予典選。實號劇曹。胡爲抗章。必欲求外。冕旒密侍。正有賴于協恭。符節屢更。顧奚煩于詳試。尙安舊著。以副眷懷。

禮部尙書倪思乞待次州郡不允詔

卿以一時人物之望。召還未久。拳拳獻納。朕所樂聞。何嫌何疑。屢欲求外。此固足以見難進易退之節。非朕所以待卿者。且更迭之制。豈爲卿輩設哉。

江淮制置大使丘密再辭免召赴行在不允不得再有陳請詔

卿以超世之資。篤濟時之志。久安故里。曾不忘吠畝之思。游鎮陪都。專以徇國家之急。言皆底績。事不辭難。禦侮折衝。旣以著偃兵之效。聞命引退。謂不應俟駕而行。一歸疑丞之班。足爲宗社之重。旣頒溫詔。日

俟來音。共政而圖。舊人注想以待元老。而乃抗章至再。稱疾愈堅。極知難進之風。殊非虛佇之意。況聞老而益壯。氣不少衰。式過其驅。以副所望。使朝廷得以諮訪。而搢紳視爲表儀。務遠乃猷。以弼予治。顧何恙之不已。諒無說之可辭。

知平江府李大異辭免除寶謨閣直學士不允詔

朕惟斯民宅。生于牧守。苟有治理效者。做虞朝考績之法。取宣帝增秩之意。不惟示勸。抑以數易爲重也。卿以諍臣。出守吳會。政聲上徹。朕所深知。進職西清。庸示褒表。成命已頒。尙何辭歲。

賜皇太子生日詔

嘉定元年八月十七日

敕某。商顯中分。元良初度。賜生設醴。用爲宴行之資。授粢貽牟。仍厚匪頒之寵。共期難老。益體隆私。通奉大夫趙師舜辭免復寶謨閣直學士依所乞宮觀不允詔

卿起臨近甸。嘗著外庸。旣辭制闔之行。仍徇祠庭之請。念宣勞于北固。欲華爾歸。俾寓直于西清。但仍其舊。卿毋多遜。朕不汝忘。

觀文殿學士何澹再辭免知建康府仍奉祠祿不允不得再有陳請詔

以金陵而爲陪都。保釐素重。護天塹而開制闔。委寄尤隆。卿以時名人。爲予舊學。蚤膺擢任。屢嘗入從。以出藩。尋遂登庸。俾爾貳公而洪化。

〔案〕洪化之洪。宋時避廟諱所改。

方權臣之遇事。宜正論之多違。久鎮三山。時稱治最。

言歸數載。朕不汝忘。屬邊鄙之甫寧。擇邦侯而分遣。惟大使之所莅。非良弼其誰宜。朕方躬宵旰之勤。卿

當體股肱之寄。聞命引道。知已屆于中途。奉親爲榮。顧何妨于色養。毋格成渙。式邁爾驅。

鎮江府都統制畢再遇乞歸田里不允詔

卿以拳勇之資。挾忠毅之氣。撫士最爲得衆。遇敵幾于無前。外則營壘之不諱。內則里閭之甚靖。屬邊陲之甫定。亦信使之交通。諸將于焉少休。來奏亦求引退。乃眷維揚之重鎮。實爲淮甸之要衝。其爲朕以少留。豈于卿而獨後。總周廬而入衛。終當誰歸。歌出車以勞還。固應有日。

京西湖南北路宣撫使宇文紹節辭免召赴行在不允詔

鄉以勸誦之近臣。往宣威于遐徼。邊陲以靖。邦好乞修。爰念賢勞。亟頒命召。何控辭之未已。又引疾以爲言。朕渴想風儀。急聞方略。俟交符于制閫。卽趣駕于歸途。毋復重陳。副予虛佇。

何澹辭免兼江淮制置大使不允詔

國家間遣輔臣。往營邊事。粵從近代。加以大名。不惟欲憂顧之寬。正以增使華之寵。疇咨于衆。喜得其人。卿以舊弼之賢。畀留都之寄。英聲有素。輿望已孚。疆場甫寧。先上宣威之組。江淮併護。再隆分閫之稱。其爲朕行。徒得君重。獨當一面。正資經理之良。坐使諸軍。咸屬指呼之下。往祗成命。毋致牢辭。

新除煥章閣學士改知江陵府充京西湖北路制置使李大性辭免乞奉祠不允詔

謀帥以鎮上游。素爲重任。分閫以護兩道。尤賴長才。卿久列從臣。屢更藩服。比奏三吳之課。繼擁七閩之麾。方塞北之休兵。屬荆南之缺守。仁聲夙著。僉論攸推。進學士之清班。益隆眷倚。總邊庭之諸將。咸莅指

呼。引道既前。遄驅毋緩。奚事循墻之避。佇聞洗印之期。

新除同知樞密院事丘密辭免不允詔

朕厲精更化。當饋思賢。樞庭既得于蒼英。宣室實深于注想。謂何恙之不已。故申命以益勤。載覽封章。備陳疾狀。使翦須而可療。亦所當爲。倘賜几而肯來。自應增重。宜進萬金之藥。勿爲三命之辭。

